

士女二

新脩武勝縣志

民國十九年 巳渝
曾吉芝署



民國新修武勝縣志 卷九

張汝翼
尹之任
同纂

士女志列傳目錄

李永寧傳

李純樸傳

張一鯤傳

田大益傳

李志武傳

王清遠傳

李繼昌傳

曹惟權傳

胡大成傳

王萬敬傳

王志灼傳

范元音傳

梁怡曾傳

黎啓善傳

李成瑞傳

唐吉漢傳

王志燾傳

楊煥章傳

易上達傳

田開文傳

彭 玢傳

劉豎甲傳

曹鴻儒傳

周興基傳

陳汝文傳

王鏡泉傳

周作人傳

唐濟川傳

高光煒傳

唐名拔傳

馮啓中傳

劉培基傳

唐明斗傳

段材岑傳

段昆山傳

王若周傳

曹宗琦傳

袁鴻志傳

段千之傳

孫自揚傳

隆運昌傳

曹應選傳

胡夢麟傳

蔣如蘭傳

冉壽祺傳

李樹春傳

唐際盛傳

周冕傳

楊安文傳

秦培善傳

劉德光傳

段黼堂傳

王鴻鈞傳

龐鑫溶傳

夏萬甲傳

張祖琦傳

楊敏傳

陳重徐傳

盧文治傳

馮鋆傳

李藩傳



李永寧傳

李永寧字世安別號正菴定遠縣人正統乙丑進士授南京戶部江西司主事升員外郎以建言與尚書忤改刑部廣東獠寇猖獗朝議推永寧出守單車赴潮興學校練戎兵繕城池嚴守備理冤獄民蘇瘼歲餘寇來款服與監司臨東山撫慰之巡撫葉盛薦於朝補廣西桂林府知府却所屬金永福陽和兩邑彫敝甚調停諸屬以靈川賦役補給會兩廣總督韓公語時勢不合不少屈遂乞致仕韓旋查其賢差官衛導以歸循良清苦人呼爲青菜李所著有正庵詩稿及瓊琚集（見楊祐文集定遠舊志）

李純樸傳

李純樸字文伯號懷野世家定遠嘉靖乙丑進士選刑部主事以才調戶部監通州擢廣西道御史時當國議與虜和御史葉某謫後無敢言和不便者總督王崇古爲庵答請鉄器純樸置奏略謂人臣謀國當辨大體虜款塞而講封貢失體甚矣天之生物予齒去角外地不產鉄而徇其求耶兵部侍郎谷中虛等

覆議欲該鎮自行鎔化恐拂崇古意故爲推諉計臣以爲大臣無有盡忠爲陛下者設虜騎長驅安望能折衝而制其命疏入用事者羣目之諸以建言獲譴若鄭元字李月濱賴純樸爲申救又疏辯科臣張齊之冤復其官按廣西吏之墨者望風解綬去鋤奸與利與督學胡廬山講性理學藝林向風條上十二事已行謫判寧羌旋移知監利故事官池魚鬻三百金爲偕計吏費純樸悉生放之出受鬻金建大觀書院置書千卷大中丞暨御史交薦憾者益擠之竟罷歸卒年四十九所著有懷野文集奏議山居錄列仙咏行於世（見蜀人物志）請以薛瑄從祀文廟時論推服（見舊通志）毀李士實碑人稱爲真御史謫監利甃磚城（見張一鯤文集定遠舊志）

張一鯤傳

張一鯤字鵬化明萬歷丙戌進士爲邑諸生時嘗與田氏捐之子壽讀書大印山之陽山故多洞洞中設榻洞外建亭顏曰小魯爲晚宿計相砥礪習舉子業幾六年自號九洞居士嘉靖登鄉榜隆慶辛未成進士旋官南京江西道監察

御史見聞博洽著述甚夥今僅存戰國策國語行世戰國策序云劉知幾曰縱橫互起力戰爭雄秦兼天下而著戰國策劉中壘亦云臣向所校戰國策錯亂糅莠其書出秦無疑至劉始定爲卅六篇晉孔衍又引劉與司馬二家聚爲一錄號春秋語世尤其不量力劉本注於後漢高誘校於宋曾鞏再注於南宋鮑彪又再注於元吳師道嗟乎諸子於是書何卷卷也徐玩其序書之旨各立畛域遞相駁刺曾譏劉曰惑於流俗不篤自信而鮑則曰子固亦求其故而爲之說非此書旨也且鮑極詆高氏疎略繆妄而吳又爲曾高左袒極詆其淺陋致誤嗟乎諸子序是書又何其斷斷也鯁竊病焉嘗劄而評之諸凡書非出六經者亡能絕純而亡訾顧其純而可觀可多識者在其訾而不可訓者亦在如夏璜之潤考蜀錦之文繡紕類莫得而掩也然卒莫能棄也孔子坊左語絕其後二百四十餘年列國相殘相墮相襲相劑而爲楚漢誰爲甄序而信諸遠雖有陸賈司馬遷無所事載筆矣是史氏之綜軸也裊闔短長譎誑相傾奪之說卽不根諸理道然縱之以陽閉之以陰肌豐而力沉骨勁而氣猛驟迴於咫尺不

爲近而步逸於八極不爲遠曉變其故嗣不爲襲而甲拆其新意不爲駭古今
談文之士率曰先秦秦之先非六國乎其文之可讀者具是是文家之郭郛也
山東之主愚於策士矜激泛濫之說而傾其國故秦閉關謝客儀秦軫衍之徒
亦自愚於其說而殺其軀故蕭曹輩興宗黃老而塞兌關中之主又自愚於其
狙詐武健而亡其天下故漢解網是主臣之轍鑿也胡可言棄也讀是書者譬
夫求魚海溟代材山林至於鱗介之修短柯條之巨細在漁人匠者審擇之而
已審擇之則子長文之爲史記袁悅齋之爲天下要書李文叔名之爲至寶不
審擇之則如曾子固所云禁之戒之放絕之而已嗟乎楚之檣杵魯之春秋一
也申韓之語不必仁義而諸葛武侯有味乎其說七法五輔八觀諸篇不必純
乎王道而房僕射于注爲之究心故夫書不必盡出於六經者然後可勿棄也
舊本注多不備而備者又以板刻年久磨滅脫誤至不可觀頃與豫章郭相奎
氏莆陽林朝介氏吉陽王元甫氏悉取諸家本參考讎校至十數過標張陸二
先生批評於上方而篇中亦頗裁其冗複說具校例中庶乎開卷明晰刻成書

其端云爾國語解叙云昔孔子發憤於舊史垂法於素王左邱明因聖言以據
意託王義以流藻其淵源深大沉懿雅麗可謂命世之才博物善作者也其明
識高遠雅思未盡故復采錄前世穆王以來下訖魯悼智伯之誅邦國成敗嘉
言善語陰陽律呂天時人事順逆之數以爲國語其文不主於經故號曰外傳
所以包羅天地探測禍福發起幽微章表善惡者昭然甚明實爲經藝並陳非
特諸子之倫也遭秦之亂幽而復光賈生史遷頗綜述焉及劉光祿於漢成世
始更考校是正疑繆至於章帝鄭大司農爲之訓註解疑釋滯昭晰可觀至於
細碎有所闕略侍中賈君敷而衍之所發明大義略舉爲己憭然矣然於文明
時有遺忘建安黃武之間故侍御史會稽虞君尚書僕射丹陽唐君皆英才碩
儒洽聞之士也采摭所見因賈爲主而損益之觀其辭義信多善者然所理釋
猶有異同昭以末學淺陋寡聞駭數君之成思義理之是非愚心頗有所覺今
諸家並行是非相質雖聰明疏達識機之士知所去就然淺聞初學猶或未能
詳過切不自料復爲之解因賈君之精實採唐虜之信善亦所以覺增潤補綴

參之以五經檢之以內傳以世本考其流以爾雅齊其訓去非要存事實凡所發正三百七事又諸家紛錯載述爲煩是以時有所見庶幾頗近事情裁有補益猶恐人之多言未章句與夫鄭虜韋唐諸君之註疏夫豈不義而甘爲之忠臣與先是同年李惟中刻內傳於督學署中不佞與郭相奎取外傳各分四國訂之註仍韋氏益以宋氏補音條註其下字畫剗刷壹放內傳庶幾稱左氏完書云

田大益傳

田大益字博真四川定遠人萬歷十四年進士授鐘祥知縣擢兵科給事中疏論日本封貢可虞因言東征之役在將士則富據今日之斬馘以論功在主帥則當視後日之成敗以定議時躉其言母喪除起補戶科二十八年十月疏言陛下受命日久驕泰乘之布列豺狼殄滅善類民無所措靡不蓄怨含憤覲一旦有事願陛下惕然警覺敬天地嚴祖宗毋輕臣工毋戕民命毋任閹人毋縱羣小毋務暴刻毋甘怠荒急改敗轍遵治規用保祖宗無疆之業未幾極陳礦

稅六害言內臣務爲劫奪以應上求礦不必穴而稅不必商民間邱隴阡陌皆礦也官吏農工皆入稅之人也公私騷然脂膏殫竭向所謂軍國正供反至缺損卽今有司威以刀鋸祇足驅民而速之亂耳此所謂斂巧必蹶也陛下嘗以礦稅之名爲裕國愛民然內庫日進不已未嘗少佐軍國之需四海之人方反切齒而冀以計智甘言掩天下耳目其可得乎此所謂名僞必敗也財積而不用崇將隨之脫巾不已至於揭竿實爲奸雄睥睨之資此時雖家給人足亦且蹴之覆之而不可及矣此所謂賄聚必散也夫衆心不可傷也今天下上至錦纓下至耕夫販婦茹苦含辛搃擊側目而無一控訴者蓋已久矣一旦土崩勢成宍爲仇人爲敵衆心齊倡而海內因以大潰此所謂怨極必亂也國家全盛二百卅餘年已屬陽九而東征西討以求快意上之蕩主心下之耗國脈二豎固而良醫走死糶索而大命傾此所謂禍遲必大也陛下矜奮自賢沈迷不返以豪瑋奸弁爲腹心以金錢珠玉爲命脈藥石之言褒如充耳卽令急于剖心梟夔進諫亦安能解其惑哉此所謂意迷難救也此六者今之大患臣畏死

不言則負陛下陛下拒諫不納則危宗社願深查而力反之皆不報明年疏論湖廣稅監陳奉救僉事馮應京忤旨切責時武昌民以應京被逮羣衆鼓譟欲殺奉奉逃匿楚府以免大益因上言陛下驅率狼虎而食人使天下之人剝膚而吸髓重足而累息以致大災地崩川竭釁自上開憤由怨積奈何欲塗民耳目以自解釋謾曰權宜哉今楚人以奉故沈使者不返矣且欲甘心巡撫大臣矣中朝使臣不敢入境偵緩急踰兩月矣四方觀聽惟在楚人臣意陛下必且曠然易慮立罷礦稅以靖四方奈何猶戀戀不能自割也夫天下至貴而金玉珠寶至賤也積金玉珠寶若泰山不可市天下尺寸地而失天下又何用金玉珠寶爲哉今四方萬姓見陛下遇楚事而無變志知禍必不解必且羣起爲變此時卽盡戮諸璫以謝天下寧有濟耶帝怒留中又明年遷兵科都給事中時兩京缺尙書三侍郎十科道九十四天下缺巡撫三布政按監司六十六知府二十五大益力請簡補亦不聽三十一年江西稅監潘相請勘合符牒勿經郵傳巡按御史吳達可駁之不聽大益復守故事力爭竟如相請內使王朝

嘗言近京采煤歲可獲銀五千乃率京營兵劫掠西山諸煤戶朝以阻撓聞有旨逮治皆入都城訴失業狀沈一貫等急請罷朝且擬敕諭撫按未得命大益言國家大柄莫重於兵朝擅役禁軍請急誅爲無將之戒御史沈正隆給事中楊應文白瑜亦疏諫帝俱不納俄用中官陳永壽奏乃召朝還遼東稅監高淮擁精騎數百至都城大益言祖制人臣不得弄兵准本掃除之役敢盜兵權包藏禍心罪當誅帝亦不問明年八月極陳君德缺失言陛下專志財和自私藏外絕不措意中外羣工因而泄泄君臣上下曾無一念及民空言相蒙人怨大怒妖侵變異罔不畢集乃至皇陵爲發祥之祖而災孝陵爲創業之神而災長陵爲奠鼎之祖而亦災天啓蹶我國家章章明矣臣觀十餘年來亂政亟行不可枚舉而病源止在貨利一念今聖諭補缺官矣釋繫囚矣然礦稅不撤而羣小猶盜橫閭閻猶朘削則百工之展布實難而罪罟之羅織必衆缺官雖補罪囚雖釋會何益哉陛下中歲以來所以掩聰明之質而甘蹈貪愚暴亂之行者止爲家計耳不知家之盈者國必喪如夏桀殞於瑤臺商紂焚於寶玉幽厲啓

戎於營夷桓靈絕統於私鬻德宗召難於瓊林道君兆禍於花石覆轍相仍昭然可鑒陛下邇來亂政不減於六代之季一旦變生其何以託身於天下哉居月餘復以星變乞固根本設防禦罷礦稅帝皆不省又明年以久次添注太常少卿卒於官人益性骨鯁守官無他營數進危言卒獲免禍蓋時帝倦勤上章者雖千萬言大率屏置勿閱故也（見明史定遠舊志）

李志武李陞吉鄧之選合傳

龐鑫溶

李志武字貴芳永寧族裔也李氏之先世居江陵至宋末元兵犯楚始遷蜀居定遠順水橋由元訖明科名繁盛俗號李原府幫志武于明季寇亂戶口凋殘甲申以還連年荒旱山蟲木葉掘食一空道殣相望志武偵知川東遵義安全挈諸弟及子廣生往至重慶大府慮民散地虛先佈令嚴禁逃亡節節閉關志武亦難民中免脫出廣生後至腦後中刀傷負劍追及之同行至南川禁逾嚴諸弟與廣生流離失蹤獨志武隻身抵遵義參將王祥守是郡盜弗敢近志武以授學餽口餘年積有貴娶傅氏生一子名陞吉順治甲午川亂仍熾其妹夫

鄧之選亦逃難至彼此相晤志武泣曰先吾出亡冒白刃涉險來此父子兄弟相離舊族原府幫萬有餘人未譖淪落何所幸天不死我保微緇獲與君重見數也之選曰自君去鄉人與吾族相繼逃其留者僅老弱屠戮餓殍死者半村里爲墟今偕室到此險阻十倍君君既娶妻生子爲李氏緜血食我以兩口累君君能爲我庇我賀君行且自賀何泣也已而以左腕束帛示志武曰獻賊之據成都也勒諸考吏科僞將暉吾往不幸中選留營聽用見獻賊慘殺無人理男子斷左手女子斷右足積餐室兩旁攢簇爲兩尖峯中設大案獻賊每飯踞案高坐啣啣視以爲樂吾左手適被賊戕因乘間遁去今創痕未合故裹帛爾由是兩家合居後志武夫婦卒之選爲之營葬鞠陞吉成立爲娶彭氏康熙十八年蜀亂平餘孽盪盡郡縣皆設官於是之選還依巴縣佐治官包公案牘而令陞吉具認狀開墾於縣屬居義里之冷水壩墾戶共七十二每戶出一人入衙聽差書者別出一人任房書陞吉以之選力得充房吏二十八年包公奉委上定遠定川東北界陞吉隨行辦差之選囑曰汝回籍祖業在河東順水橋臥

牛壩地當大竹鄰水出口路多盜不可居唯河西郁馬里快圖壩一帶本原存舊業地偏僻距縣治遠且未設官差事少居此其宜陞吉遂歸呈包公定案准予復業時定遠當劫後土地荒蕪遠方來開墾者僅六十戶陞吉乃訪其族戚子遺畫壞分給以玉皇觀小溪上天王廟溝灣一帶與夏太極以潘家場分嶺下溪壩與劉璧以新廟子快圖壩上壩與劉召快圖壩分嶺至小溪與太平里族人李星秀俾各認糧耕稼長養子孫旋至巴縣省父墓迎之選還籍包公堅留之不遣時已病且老陞吉躬侍湯藥俟其卒擬扶櫬還鄉時璧合三峽棧道絕荒江船少乃葬重慶後山爲之碑題曰明貢士鄧公之選墓陞吉遂爲定遠土著生子玉字彬佐年十六入縣學雍正癸卯科卷薦未中以壽考終

清

王清遠傳

王清遠字字暉號翠岩一號蜨園年十七補弟子員名藉甚乾隆丁卯舉於鄉戊辰成進士任湖南臨湘縣知縣調城步再調長樂邑以苗地未設學校清遠

蒞任後進民之俊秀者親與講習文風始_折因請設學尋調繁監_和獲鄰省巨盜置之法同僚皆賀清遠曰除盜安民守土責也豈可以此邀功卒不求保薦俸滿陞貴州正安州知州旋以同官被累鐫級歸扁舟西上行李蕭然抵家後閉戶著書淡如也富道聘主東川書院講席汲引後進多所成就著有修竹堂集(見四川通志定遠舊志)

李繼昌傳

守石韞玉

歲己未余奉簡命守渝郡董子謂守令爲民之師帥承流宣化莫切於此每思得行誼方正者以激_庸末俗而未之能逮時定遠令孫君煦爲余言邑武庠生李純修敦孝友尙廉介好施與素爲閭里推重邑有公事可囑且勇於義今值_劫匪不靖數領鄉兵_埒截制勝竟以禦賊力戰死並具詳摺請余申報大府余惋惜久之亟然其請旋經大府題奏仰蒙_我皇上嘉恤忠忱俾從祀忠義祠既余奉憲_柳巡_和嘉陵河道孫令率純修冢嗣明經名業者持行狀泣請余爲記按行狀君名繼昌字純修姓李氏先世籍楚北麻城徙蜀遂_家定遠父怡生子

二長卽純修季繼宗父子俱列庠序爲時譽髦純修生平行事胥如孫君所言
自嘉慶丙辰白蓮教匪王三槐擾害川東北境地純修爲團練募義勇農家子
弟執戈揚盾翕然相從至台州渠江廣安州衡興場冒死殺敵衆率敗走自
是聲威益振聞李秀才兵至輒中夜撤營去戊午冬賊首張漢潮焚掠至定
壇河東居民半攜家遠避純修痛桑梓流離不忍拒以委賊僅獲鄉勇二百人
至伍家岩防堵羣寇蜂集兵盡矢窮而勢遂不可爲矣純修遇害十一月初八
日也年七十四時陰雨昏黑連日不開烈士精誠動天地如此嗟乎古今來享
高爵厚祿臨難苟免不旋踵而顯戮隨之重爲後世辱笑者何可勝道純修未
受一官半秩慨然任國家之憂拯生民之溺令其出而圖君定大謀建大業其
樹立何可思議耶抑余向所謂行誼方正激勵末俗者庶幾於純修得之而竊
悲其死又重其死之有裨於人心風化不小也夫表揚節義以啓迪後人守土
之責也遂書以貽李生如右

曹維權傳

曹維權懷正公長子次文學維櫛處士維楨維棟維樑維楷維模監生維彬末
維柄弟兄共九人懷正公秉性端嚴動遵禮法令九子拘處一堂不得與羣兒
嬉戲暇則講古今孝友以教之故九人食則同食寢則同寢及壯不異孩提懷
正公卒九人聚廬於墓每晨夕環泣於墓側三年乃止九人同居一宅或一日
相遇十次遇必揖揖後必問安否至老不倦幾不知人間有分析事後家人至
二百餘丁猶同居合爨無間言邑令孫公至其里聚九人於輿前獎之曰昔高
陽氏有子八人皆賢遂署其里曰高陽里今公九人孝友一堂年皆至耄猶同
游於山林田野間定邑之幸實國家之光也表揚孝友邑宰之責曷詳請以旌
其門維權九人力辭不受後維權壽九十二維櫛下皆八十七十餘歲至今人
過其里咸稱爲孝友曹家溝云（錄舊志）

胡大成傳

孫國藩

胡大成字柏坪清嘉慶時人世居武勝走馬鄉大河堰家貧幼事芻蕘年十二
猶未入塾然天姿絕慧企讀書貢生胡永年設塾鄉里距其家近每日午前爲

生徒講經大成輒往竊聽之一日永年抽問經義生徒不能答大成於塾後代
答頗闡精蘊永年驚出見大成曰子學幾年曰未也未學奚以知經曰昨竊聞
先生之言也永年奇愛之因勸大成父送子入塾辭以無膏火資永年約富生
醵金爲助大成迺得從之遊學六年初應試以果郡密邇遂便冒南充籍卽補
學官弟子員文名噪焉清代科目取士紈袴子鮮學問亦思博青矜以爲榮則
恒倩人作詩文應其倩者曰鎗手大率寒峻迫於境遇者之所爲也大成雖列
鬻宮家無作石爰偕渠族胡國玉胡國粹輩橐筆外游充鎗手謀蠅頭以掙貧
有紈袴子以重金債大成頂名入試場交卷獨先督學使者陳某親接閱訝其
文工且速非童生所能爲目爲鎗手大成立辯卒詰以本童三代名瞠目莫對
故事查獲鎗手責加示衆陳因命役責掌大成曰士可殺不可辱如憫生寒而
宥之也則已實不見容請親責辱以役非敢受也陳固和厚憐才者兼善麻衣
術允親責大成狀貌魁梧豐皙伸掌而前有貴紋陳異其言壯而相非凡也逆
爲大器適他生交卷纍纍陳託詞閱文命大成跪地俟暇始責移時曰可厭斥

跪遠又移時曰實可厭斥再遠如是者數漸跪至階下平壩中俄而啓門放排大成驟起溷諸童生出役見大成逸大呼追捕槍手陳止之蓋陳不忍窘大成而大成亦心喻陳之故縱己也由是且慚且奮返里潛修越年舉於鄉深以遠大自期會達縣王三槐倡亂騷擾川楚頻年未敕平朝廷詔額勒登保入蜀督師大成丁茲時艱遂投軍幫辦文案思討賊以立功名夫登保滿大員也才具幹練性貪婪偶與賊戰敗績大成匠馬而奔賊跟追離僅半里許急奔上山山有廟叢林深邃大成繫馬廟前徒行林後賊至見馬疑在廟匿搜尋延時大成去遠因得脫險而心鄙登保不潔歸不復入其幕終日閉戶鑽研經史嘉慶己未年赴春闈涂間尤手不釋卷拈題作文同行友笑侮之不顧是科登進士第旋入翰林院未幾得授待讀學士大成爲人剛正有氣節不附權貴時登保己平賊大拜從未投刺惟前督學使者陳某在京大成感念曩情曾以門生禮謁之陳某茫然既覲詢知爲當日故釋之鎗手也談笑交懽繼遷監察御史獨劾登保罪狀八條首爲尅扣軍餉奏入嘉慶召大成至便殿親詰書生出身何由

知扣餉事大成對以前任登保軍營文案故知且於扣餉情實言之確鑿帝心嘉其忠鯁令退餘條未鞫不數日特旨授廣東雷瓊兵備道而登保以親貴大臣得免議深憾大成思中傷之大成蒞任治民察吏無負繡衣道署舊有綽楔橫額大字爲蘇文忠手書勢將圯大成欲捐俸補修幕友某請派屬員從之屬員某知縣爲登保門生承其師意控大成濫派屬員登保尤賄某御史參奏大成遂罷官在任僅數月耳初大成未遇時常夢此綽楔罔知所在逮履道任得見渾如夢中以爲仕途佳兆故爲之補修也至是轉悟爲妖夢云大成歸田清風兩袖宿債未償索者間或登門避無臺也惟有杯酒言歡平居無事仍讀書寫字以爲樂嗣挈家徙居巴縣磁器口數年卒所著有默耕軒文集筆氣清剛詞無蕪懦一時文人多誦之惜効登保奏稿未聞有存者

孫子曰清代二百餘年吾縣文人蜚聲翰苑者惟大成一人不可謂非山川靈氣所鍾也顧竟寄籍南充何又縣運之衰耶雖顯宦數月卒至黜困然効權貴以膺帝簡剛正氣凜然自足焜耀千秋吾生也晚未獲覩大成生平家傳亦無

從尋訪以外祖增生胡耀川公爲大成之從子嘗縷述其行事髫齡時耳之熟
聞采厥語而著之中多失名蓋年久不免有忘云

王萬敬傳

王萬敬號直夫性孝友用情寬恕遇橫逆不校傳家惟事耕讀三世皆精岐黃
術活人甚衆無力買藥者恆周恤之曾代傭工胡某銖積百餘金胡病故慨將
所積交胡親族爲葬具妹丈某家貧早孤不事生計遂以已田借與耕種使
得安恆業後至小康生平睦嫻任卹濟人困苦事大類如此子志灼號見三道
光己亥舉人品學兼優失怙時繼母甫歸三月敬事若生母歿後喪葬盡禮事
兄最誠篤季弟志燾甫十齡親訓之後入邑庠主講印山書院九載訓課嚴密
從遊數郡畢至邑采芹攀桂捷南宮多出其門後任榮縣教諭善誘多方尤以
宣講勸導愚頑爲急務自奉甚儉持守端嚴士林欽之（錄舊志）

王志灼傳

王錫鑽

王志灼字見三鄉賢萬敬公子也幼聰慧課以詩書如舊讀年十六冠童軍

旋食餼中道光己亥恩科舉人庚子會試不第回籍受邑令聘主講印山書院
凡九年其教人以程朱理學爲宗門下士化之循循謹厚每歲科兩試遊庠補
廩者聯翩繼起踰年范元音成進士彭坊田開文同登鄉榜皆其教澤之所涵
濡也志灼性孝友母鄧太孺人以奩費值千餘金買置田宅不自私與其叔均
分之弟志燾侄肇珪均親爲講授先後補弟子員堂侄肇問負重債慨然出所
餘貴償之俾得保全祖業凡里黨不能嫁娶者必量力攸助無一不出於至誠
咸豐癸丑與大挑得二等乙卯授榮縣教諭作育人才學校大興時榮舊規新
生入學院費無限制志灼自奉廉不較多寡鬻序之中頌聲作焉而平日詳報
節孝亦不言油紅費潛德幽光賴以昭著無何滇賊犯榮境志灼與縣令謀戰
守勞怨皆身任之賊累撲城不能下解圍去數萬生靈遂保全無恙辛酉夏以
勞卒於官勅授修職郎四子曰肇瑞曰肇琮皆入太學曰肇琇縣試第一曰肇
瑩府試第一同榜入泮琇任保正有直聲瑩擢光緒丁酉科拔貢選授合江縣
教諭孫鴻恩鴻鈞亦以增生廩生有聲庠序邑人嗜嘖焉稱爲盛德之報云

范元音傳

尹之任

范元音字雅南邑東惠新里樂善場人父一榮清例贈文林郎兄昆山邑廩生
昆仲五人雅南最少孝友性成尤純謹嗜讀自束髮受書終歲居窗終日伏案
未嘗馳心於外道光丙午夏科試入邑是歲秋闈卽登賢書時年二十三嗣
後兩上春官不第歸里設館授徒循循善誘成就者多咸豐庚申縣尹慕其賢
禮聘主講印山書院從遊者日益衆其教人以德行爲先文藝爲後貌恭而性
和匪特門弟子敬愛之外人亦恒多親近焉時滇賊擾縣逼城下雅南佐縣尹
李赤城督士民登陴防守卒得轉危爲安賊平後仍事教讀至同治十年辛未
科會試中式進士以知縣卽用乃自以其性恬靜不近刑名不慕榮利請改教
職回籍候選光緒二年八月選授成都府教授三年正月到任至六年大計督
憲丁器重之保薦卓異委兼錦江書院監院九年正月初次俸滿留任十年正
月二次俸滿留任是年大計督憲劉再保薦卓異又委兼尊經書院監院後於
十七年五月因繼母胡氏病故丁艱回籍計在任十餘年送考數次遇寒士則

減免院費來見者或不取贄以澈解任歸囊仍空空兩袖清風而已時年已六十有五由是淡泊自甘足不履城市居常拾殘書裝訂間參內典或吟詩以自娛幾有尼父發憤忘食樂以忘憂不知老之將至氣象年七十作夫婦生壙自爲銘曰石熙下士高平鄙儒父曰榮公母出殷都昆仲五人予以季呼生質既魯人笑愚迂道光癸未菊月以生廿四乙亥實予降庚白少至長父教師成蛾術時勉忝附科名歲維丙午齡屆廿三泮芹夏掇月桂秋攀京遊兩次退館塾庵咸豐甲寅蓼莪抱慚庚申以後主講印山演賊圍縣獲救始還同治丁卯父辭塵寰攀髯莫逮衣永埋斑辛未禮闈試雋南宮才拙辭縣教授蜀中仰蒙制府丁公劉公兩保卓異永矢清風錦江尊經書院迭兼愧無實學勵俗超凡光緒辛卯言賦歸帆守胡母制俗務胥芟幼時作配齋本鳳雛同心眈勉患難相扶甲申秋望寅降吉符今偕稀古共穴謀俱迺作幽壙頤起待期無德裕後恥有溢詞惡小宜戒善小宜爲勉哉後人以古爲師其爲文樸質若此可想見其爲人後三年卒壽七十三生平所作詩文多散佚不存

梁悅曾傳

張汝翼

梁悅曾字我魯邑飛龍鄉人家貧力學通經史清嘉慶間與弟悅孟並邑廩生
文名日盛設教四方靡不樂從及門受其益而得雋食餼者前後凡數十輩歲
貢譚孔安恩貢蔣灼其最著也悅曾爲人重德行不喜門徒與外事蔣灼號東
平素擅才華邑有大政如議糧稅修補城郭諸務必待一言以決悅曾甚厭之
適灼年五旬親造其家丐爲序言悅曾曰蘧伯玉行年五十而知四十九年之
非子之非不自知吾爲子序之可也於是援筆直書毫無隱諱文成囑曰必書
此吾將至子家觀之灼懷歸書於板而不刻託言匠未至懼面責也其古直剛
方之概大率類此悅孟以善書稱今文廟禱星門三字乃手筆也悅曾子大宇
字東侯道光甲辰副榜主講印山書院兩載有聲士林欽仰光緒初邑舉人王
鏞進士范元音奉令續修縣志於採訪編纂均倚任焉孫子昭字敦夫亦廩生
守祖考遺訓本道德爲文章故每擁皋比講學不忘家法今邑人謂河東梁氏
三代科名以此

黎啓善傳

尹之任

黎啓善邑東眞靜鄉人光緒四年己卯卒年六十卅州在籍翰林伍肇齡爲作墓誌曰慶翁黎君定邑之孝廉也諱啓善字吉人號慶餘世居河東以儒行傳家宗祠譜序甚詳自祖元公由黔入蜀六傳至茂亭公舉三子仲賢叔端公其伯嗣也幼穎慧於書無所不讀博綜淵邃而獨得其精醇故冠年入邑庠旋食餼辛酉恩科登賢書而其名愈彰公爲人溫良惠和涵養精深人莫能測其涯際至與人衡詩文論經史循循善誘各訣蘊奧雖未建子雲之亭設扶風之帳而師表衆儒訓育宗姓交錯恆無虛席庚申鐸振華陽歷署新繁士林沐教澤者十餘年不啻蘇司業鄭廣文焉癸酉丁太孺人李艱回籍葬祭躋悉遵禮制邑人尤爲向化晚年清高彌勵凡保甲捐輸及邑中鉅細公事一言而造萬姓之福者尤不勝書子五長暉二十年遊泮次曦候選巡檢餘均琳琅玉樹秀穎超羣孫等更岐嶷不羈知其由來者遠矣今封崇告竣請誌銘於齡齡誼屬世寅不敢以不敏辭他日世兄輩奮跡雲程名標史冊永垂不朽當不僅齡之

徒窺一斑已耳爰爲之銘曰山環螺秀水拱鸞翔漫云邱壑中藏元良泮宮采藻蟾窟分香靈鍾石照鐸振華陽緇林岷璧絳悵琳琅牛眠鬱鬱馬鬣蒼蒼鶴停鵠峙桂馥蘭芳貽爾子孫積厚流長

李成瑞傳

尹之任

李成瑞字北材譜名世苾河東惠新里人幼慧有至性讀書過目成誦弱冠入邑庠旋補廩餼束躬秉禮篤行孝友道學風家貧授徒自奉極薄事父母必常珍且先意承志少時祖母徐病廢成瑞伏牀蹲鑪親侍湯藥數年無間歲入脩脯贍諸昆季使耕者有貲讀者成名講學凡五十餘年惟館於邑之東山寺最久幾有其年之半其訓人先德行而後文藝酌用真西山與董子齋規雞鳴卽起盥登講席執經者列坐惕栗不怒而威課畢天方曉日惟靜坐寡言至析疑義則不憚辭說必表裏通澈而後已時或巡行齋舍查自習勤惰雖隆冬子夜弗懈故遠近聞風來學者衆采芹食餼者歲恆無虛焉其爲文雅正下筆輒數千言十薦未售亦其數也其與人交守正不阿有不可必面斥其非館處雖城

相近然未嘗與詞訟事名動長官終不一往見晚年家居常爲鄉里解紛難人咸服其公正生平著述頗富清咸豐間滇匪襲圓山觀稿被抄毀無存同治壬申四月卒年六十有八其次子德輝字藻號揆廷有異質受庭訓補廩人貢註選訓導其爲人孝友端方躬行節義啓迪後學卓有父風孫曾輩亦多克繼其學

唐吉漢傳

張汝翼

唐吉漢字維炳別號三復道宗其長人私諡也宋唐介二十四世孫清康熙初遠祖國良由湖南遷蜀之定遠入昇平里籍世業讀耕曾祖仲璽崇理學篤行慈善爲鄉里式父必文早卒母氏陸無出撫夫弟必芳子卽吉漢也初生時其曾祖夢天漢流光一人乘碧雲握金書冉冉下降於宅故以漢名六歲生父以論語授之問曰此書何人作曰聖人也曰聖人與我同類否其生父大異之八歲入邨塾動止率有程渠且勤學聞叔必禮謝孝弟等字卽能體行自題座右曰好耍終不好耍不可不慎也十五志易學凡諸家易解靡不考究二十二以

太學生員造縣書院劉世昌之門習舉子業儀容莊敬每請業世昌必正襟危坐以應嘗曰吾閱人多惟見此生恒懍懍戒懼是不當列弟子行也越兩載吉漢以詞章無益學問乃築齋里中博求經傳子史及宋以來學案旁參佛典道經方書丹訣又以孔子加年學易章編三絕與易傳苟非其人道不虛行此中必有真學於是徧訪當世賢士罕有知者後讀魏伯陽周易參同契兼訪玄宗覺黃冠羽流行行妄誕益篤信聖學於書室中題願學孔子四字又一聯云莫覺利名墮地當由賢聖希天自是不復着筆於制藝日惟一志道學事親而外卽閉戶著書前後數十年成帙多種未嘗直署姓字於簡端以要譽當時如教學正宗一書隱號扶化童蒙急務洎女子必讀隱號石平士又闢左道說託名復初居士黜邪公言託名次木汪年訥周易實事託名文嗣馨生子至聖學總論則又隱其人曰文緝根芳枝氏瓊塘阜東子陸育吉錐灘餘則幼儀生篇立命錄陰陽律例家禮八則呂祖家規衍義易俗篇度世金鍼啓蒙真詮聖賢實學易道真傳修真程途中庸直講修真十宜知止篇人學要篇等書散見於各

地皆吉漢手著也道光間聞雙流劉沅知道訪之言論多不合吉漢談及盡性之旨沅曰此真程朱正傳咸豐初設帳於本里明倫村門曰維世凡登拜者必教以實踐聖學爲要後因援貢士例赴鄉試如成都所次學士雲集官紳折節塾江西漚李惺來訪吉漢與譚氣稟物欲之所以然惺曰先生之學誠哉有本矣爲步雲子詞二章惺又曰先生之道超然無侶矣了道外丹成時吉漢年已五十三矣逮咸豐辛酉正月集門人於堂申詳盡性之理設直友約教其互相規勸復與門人范兆蘭隆顯猷賈志仁徐貴昌等共六十餘人同訂力拒邪說以衛聖教之盟時作勸學歌自籌歌歌中有隱隱高飛一語二月遂甯譚文典堵賊死之吉漢以文典不明時勢死義未當尤恐諸生學聖而拙又作無益之死因作訓及門勿強平賊詩是年四月辛未取所著人學要篇註之註至楊忠愍公臨刑詩生平未了事留與後人補之句遂絕筆越翼日壬申寢疾舉止無苦狀惟思靜睡睡久則起坐凡入問者俱囑無多言越五日丙子氣息忽絕家人惶思生父必芳入室呼之卽離座敬對言貌如無病然戊寅午初命移居正

寢整衣端坐而終葬之日有門人魏子文斗故人吳子六君遭吉漢於道與語
移時皆不知其已死也李惺爲撰墓志銘曰先生幼穎異有志聖學長工制藝
振振有聲無意雲路以顯親不在是也惟嗜古敏求陶鎔貫鑄深達天德之學
大發維世之願知行合一切實踐盡希賢希聖不趨膚末焉先生道高德著督
撫徐公趣之不就門下士大夫多至不可籌計先生因材施教導納之中和之中
而學者亦莫不服樹立數百萬言以輔王化維聖道欲盡人而同歸於善間雖
學闡釋老教明鬼神無非俾慕者俱遵六經逃法者咸知修省其孤詣苦心可
知矣後世大亂亟欲呈策平定亡何其道不行哲人竟萎年五十有六而歿嗟
夫先生之道原人骨不朽者也惺聞訃不覺心悸然驚翻然疑繆然思以爲其
道非耶旋聆沒後諸異狀益信先生之存沒悉定其性命於天非若悻悻然生
泯泯然去者惺得親函丈爰就鏡測所及聊志其概以詔後來先生生於嘉慶
丙寅年秋七月辛未沒於咸豐辛酉年夏四月戊寅附葬陸太安人兆右記之
使有考焉銘曰聖沒言湮異端日起天牖先生不闕自己道明一原學揭歸旨

三教復真咸宗孔子屋漏帝天用策行止尊貴隱惡悉知畏忌道範師模卓然罕匹諡曰三復千秋法矩

王志燾傳

唐斯盛投稿

志燾字鶴皋姓王氏世居邑西萬善鄉之石壩子昆仲三人長志廣卽庠仲芳之父次見三癸亥恩科舉人大挑二等特授榮縣教諭先生其季也吾邑學派自王氏兄弟開之在前清道咸同間一時文學之士靡不以王氏兄弟爲依歸斯盛生也晚未獲從先生遊仲兄際盛曾請業先生門下受知最篤嘗爲斯盛言曰當見三先生主講吾邑印山書院時挈先生讀同時及門者有范雅南彭松軒田育堂皆瑰奇負異之士而先生下筆爲文清真絕俗爲同學冠其書法秀麗遠追歐趙見三先生恆以翰苑才目之嗣范成進士彭田領鄉薦而先生僅青其衿雖秩闈屢薦終不獲售羅隱數奇古今同慨先生讀書過目輒記凡周秦諸子馬班羣史以及閩洛之淵源唐宋名賢之詩古文祠無一不精通有得始設塾於家爲諸子讀計繼以文請贊者衆乃出而課學辨析疑義表裏通

徹老嫗能解善誘大率類是一時身列門牆者如段氏昆仲劉氏叔侄暨合岳鄰封之張羅喬梓皆名重巒序造就有成他若食廩餼之張文林中副榜之袁璧成亦得其衣鉢爲縣學經師其堂弟志渭明經貢士堂姪孫益贊幼年遊泮堂姪蓉丞乙酉選拔胞姪蓮舫以光緒庚辰縣試拔第一文坡卽以郡試列案首後文坡又以丁酉科成拔進士皆先生教成之予昔綴學屢矣賴先生宏獎樂育乃至有今日亦云幸矣旣而曰先生尊翁萬敬公善醫心存利濟富者不索謝貧者不受謝且解囊助其藥資與先生教學貧不責其脩金而謀助其膏火家學相承其事不同而合先生之教育其得自庭訓遠矣仲兄之言如此斯盛聞而志之嘗考杭州府志北宋靳豪居東京顯仁坊隱居市藥且設漿以濟行人宣和間有二道士語之曰君長者子孫必當有厚報平陽府志明洪武時韓昌以醫聞適有推車者病道旁昌診而藥之並推食食之病者叩謝曰願公上壽生貴子後俱如其言而韓昌三世甲第先生之尊翁宅心救世與靳豪韓昌合而爲三矣宜先生之昆仲食其報也不第是也先生嫡孫鴻惠姪孫鴻恩

鴻鈞皆邑諸生鴻惠現爲高小校教員振振有聲明德之後必有達人其斯乎其在斯乎今先生歿五十有二年矣迴思仲兄之所言而先生之道德文章有不可使就湮沒者特次而傳之藉以補斯盛未得親炙先生之缺憾而並以志仲兄際盛受知之深云

楊煥章傳

尹之任

楊煥章譜名文彩字錦成邑東恩永里二磴岩人方正誠樸言笑不苟篤孝友重氣節少而好學焚膏繼晷雖盛暑嚴寒不輟其母謹氏憐其苦每至更闌必呼之再三始就寢成童能文屢試前茅與邑進士范雅南舉人彭松軒廩生范崑山陳梧桐等就印山書院肄業同居喜雨齋共硯席訂莫逆交以理學互相勵弱冠後入邑庠旋食餼後授徒鄉里教學相長文名噪甚從遊者日衆成就頗多六赴秋闈疊膺薦兩次堂備皆以額滿見遺門人有謂其所以不第者殆天不欲勞以仕宦之煩故留置諸黨庠以爲後學模楷也其尊重之如此清咸豐末滇匪犯境鄉人推舉總理若事督辦團練後又舉任保甲凡鄉里鼠雀

爭得其一言無不煥然怡然相悅以解邑侯李玉宣梅曉山學師巫顯清趙樹松咸器重之每相見輒呼先生而不名卽此可想見其爲人年屆八旬矍鑠猶昔皋比展卷終日危坐寢食俱忘有古人耄而好學之志其爲文樸茂純粹門人錄以付梓名錦城文集范雅南曾爲之序後數年卒

易上達傳

張汝翼

上達字直廷邑飛龍鄉人父良棟生子四上達其季也七歲失恃學樂之年失怙時家窘姑父蕭學詩素好義慨然以送讀爲己任上達少穎慧性嗜學雖嚴寒盛暑無間或至忘寢食厥身類晏子而精神較強於經史子集務欲盡羅心胸而後已惟蓄之也厚斯發爲詩古文詞灑瀚無涯涘咸豐五年冒岳池籍赴果郡院試督學可紹基賞其古學淵博取以冠多士名遂馳川東北然隱痛其

父當年罹變全孝

上達祖萬鍾罹於法讞流罪父良棟以身代之後遇赦歸

每飯不忘期以顯揚慰幽魂於地

下奈運際迤邐朝不謀夕犇走四方鬻文以自活如是者有年歷科凡五至同治丁卯帶補壬戌恩科始領鄉薦繇是益自刻勵冀入詞林四試春官未第乃

受征西節帥張曜聘萬里從戎草檄參謀才智甲同袍屢出籌邊奇計力爲之盡曜遂相視莫逆優禮以待館金歲千餘時復倍加餽遺上達每得財物必分潤三鄙及同鄉交好揮霍仗義出於天性後曜復以上達勞績迭奏於朝允其請誥授朝議大夫晉封中憲大夫欽加鹽運使司銜賞戴花翎儘先選用知府嗣因數奇不偶竟賈志歿於新疆喀什噶爾嵩武行營年四十有九時光緒八年正月二十八日也易箆時猶諄諄爲曜畫策安邊曜固尙節概重然諾憐其才哀甚面訂身後必代請獎廕襲立署生死無二四字與永訣爲厚備含歛賻贈咨請勘合派營員督同兵弁沿途護送靈輿回籍聞扶柩之日軍中幕僚數十人泣送二百里外云

田開文傳

張汝翼

田開文號郁堂邑鼓匠鄉人祖家望字曰智父天命字元亨皆忠厚勤樸耕讀傳家世以孝友稱開文少時從叔祖家樂讀輒許有造後出就外傳內顧多艱思棄業祖父仍督勤學始遊邑孝廉王見三之門咸豐五年入泮後設帳本鄉

和煉觀有年同治庚午科領鄉薦名大著辛未赴春官試歸應合江縣令聘入
幕教讀越明年壬申丁父憂遂旋里以守制故仍館鄉寺光緒三年知縣郭鳳
鳴聘掌印山書院負笈者接踵而至六年庚辰北上會試大挑二等候補學正
回籍仍主講邑書院前後凡十載邑中祠廟碑記泊名鄉鉅公序傳多出其手
爲文不矜奇立異樸實渾含如其人十四年戊子膺部選雷波廳訓導到任作
育人才不遺餘力與在鄉邑教授無稍殊一時士林仰慕如慈父母開文素性
友愛先是離家時其仲弟成出貿甘肅未歸及到雷波學署心恒時時歎仄十
五年三月倏聞成沒碧山中乃西向哭並手書哀詞一篇曰哀哉兄南弟北死
別生離潦倒終身百無一成而乃客死他鄉未嘗親與永訣是固予不能庇弟
之愆抑亦予弟兄之福命俱薄也故鄉中亦多遠道貿易者或以赤拳而旋興
什伯或以中貧而坐擁萬千吾弟願望非奢不過逐十一之利以營生卒至囊
橐莫充家貲轉耗魂羈異域莫能生還豈果氣數使然耶嗟嗟今日者父母不
存二弟云亡三弟雖在家無恙而時運迤邐事與願違予秉鐸雷陽而又薄祿

缺枯分潤有限爲弟悲仍爲予悲言念家庭往事不堪回首吾已矣乎吾其無意於人世乎後數年卒於任年六十其子笏卿扶櫬歸葬又數年三弟學亦逝侄培基入邑庠其古樸忠直頗類開文鄉里賢之競聘爲塾師反正後卒於家年五十

彭玢傳

張汝翼

彭玢譜名代湘號松軒邑飛龍鄉人事蹟見岳池舉人王宣獻墓誌銘其文云光緒丁亥獻自安漢解館旋里謁先生於字庫樂故第時值營壙諄諄以墓誌囑獻承命悸恐慮不得當旣而思岳定兩邑數百里間遊先生之門者以千計茲事不囑他人意以獻從遊久知之深自言之切而可令後世據爲實錄也故不敢辭先生姓彭氏譜名代湘官篆玢別號松軒心一太老師五子幼稟殊姿誦書日數百言過目不忘及發爲文風雷雨雹變化倏忽騰天入淵蕩心駭目又如雲興天際歛如車蓋凝矚未瞬彌漫霰霽鄉里諸名宿見輒攝伏無敢抗衡弱冠受小笠何先生知尋以優等食餼時論以爲歷金門上玉堂直指顧問

事耳而先生苦坐寒氈歷應鄉人聘爲色養資仍兼肄舉子業獲雋者數次卒不售卒至分貢樹香數年年且五十始登賢書嘻將窮達固有時歟御大器必皆晚成歟夫人所不能窮者必推本於天天注膏雨人以爲甦旱苗然也天生賢俊人以爲拯顛頽之人然也然而運相合則雨際其時值其地旱苗得仰其澤人也得位行道顛頽之人賴其力若伊尹傳說太公望管夷吾之類是也運不合膏雨降乖其時賢俊生阨於遇旱苗無所資百姓無所賴顏子子思孟子董仲舒之類是也故賢俊之生人得賴其力天也不得賴其力亦天也先生才高望重爲遇所阨不獲假手一試而品學之優衆所欽仰及門經指授者多成名以去得英才而教育之亦可謂君子之樂事已尤工窠臼書遠近紳耆有宴會率以得先生書與文爲光寵求則給之無稍靳先生之捷秋闈也尊甫心一公暨孺人周并百齡并康健先生聞諸大吏請於朝欽賜正六品銜妣封宜人曾祖諱昭妣氏吳祖諱俊起岳增進士妣氏廖俱以先生故追贈如例配周孺人克勤克儉內助稱賢初家無尺寸迄今置業百餘畝孺人之力居多子定科

以文章紹先烈後選學正堂孫四文伯文仲文偉文傑俱幼挹其光氣已如瑤環瑜珥蘭茁其芽繼自今先生第優焉遊焉徐以觀孫子之成則斯墓之空穴以俟又不知幾何年固先生之樂也亦獻與羣弟子之望也 銘曰緹胡然而修汲也脍胡然而裘集也玉琢於璞而不登於廟世不識也執漑餘波之森森澤媿靈霽也式此幽墟何妄豈也我銘以貞之顧瞻者直襲也

劉豎甲傳

龐鑫溶

劉豎甲字篤生石盤鄉人天才機逸放任不羈弱冠入縣學肄業重慶東川書院年節諸生皆散獨豎甲留齋誦聲瑯瑯院長某太史問之答以道遠貧無歸太史愛其勤遇之厚學益進中咸豐庚午科鄉試舉人首藝題暮春者一節豎甲文本邢疏謂孔子與點傷道不行與浮海居夷同意詞極清警後經磨勘訾其背朱註罰停會試豎甲初有志於科名至是被議塊壘抑塞又素疏闊傲慢不合時不能生產則於學使歲科院試挈橐筆隨柵爲生童捉刀售藝輒中名大謨學使稍稍識之知其才恒予末減至夔府主同姓家富翁也謀爲其子博

一矜求代庖冒名入學使睨之詰叱曰汝定遠劉某也應曰然生與若族屬近
支今回籍赴考不浪遊也同姓復檢宗譜證之遂取錄縣人大譁謀伺而毆之
乃遁去嚮所獲金錢任人揮霍殆盡益無聊落魄四方風雨饑寒唯其意所適
而跡弛輕脫視天壤間一切事事物物皆虛憍攀拘不堪置念有時借貸所得
輒拉輿臺皂隸傭販優伶入屠門大嚼酒酣耳熱擊案上唾壺激昂悲壯自鳴
不平蓋夙好音律所至見道旁喪家輒進謁鼓樂亭弄絲竹曼聲長調音節悽
愴或代喪家撰哀辭誄文落筆如飛弔客皆驚或延以課讀不顧而去究不知
其爲孝廉也會前院長某太史視學湖北聘監甲往衡文同幕某藉竊太史名
章受賕舞弊逼斃人命事聞奉旨拿辦太史自經幕客例同坐監甲偕一僕走
徒步轉夔萬山中雪深沒蹀甫抵里而縣令奉大府檄捕之急僕復盜篋他遁
疾大作蜷伏於破廟草間以死里紳秦某知其事爲具棺舁歸殮而葬焉監甲
之學行同時與南充學李蹊言相類皆落拓以終蓋侯夷門鄭板橋之流鄉人
編俚曲以摹其狀至今傳之而獨少其行豈知其曠然自異於塵埃之外也不

然以豎甲之矯稍歛卽館穀亦可活妻子乃自苦逆於時爲貧賤以肆志則世之求富貴利達爲妾婦之行者羞矣

曹鴻儒傳

龐鑫溶

曹鴻儒字魯生縣城北關外人也父正邦武舉勇於任事而尊禮文士爲人所難嘗設旅店於城西御史坊下縣試之期儒童投止文場出入輒提燈往遠迎不取食宿費每餐輒躬烹調奉杯盤以迓諸生侍立其側諸生不自安溫言慰之人以是視曹太公之有後鴻儒年弱冠由優行廩生考選同治癸酉科拔貢朝考就職州判旋於駐川陝西米捐局報捐驗看籤分陝西試用年滿甄別撫憲加考以年力富強事理明白堪以留省補用先後經統領蜀軍原任巴里坤總鎮廣東陸路提督調行營辦理文案隨赴山東委派河工築姚家口合龍處異常出力撫部奏保以知縣留原省補用丁父憂回籍繼丁母憂在家五年自畊祖業日荷鍤偕傭僕苦作煙雨笠簔終年靡懈入城市酒脯赤足行躬負戴不假人力與鄉老談穡事占天時辨土宜老農弗逮官紳邀請則不往視之蔑

如也服闋赴原省撫憲給咨吏部帶領引見以知縣用委安康縣先微服往按縣境風俗知差役刁悍視事初於大堂懸一鉦民有訟許鳴鉦卽坐堂聽距城十二里有千工隄百年前以千人築之故名引漢江水可灌萬餘畝田淤塞旣久同城興安府知府童兆蓉以實授五年治隄不就鴻儒至高下形勢紳募欸建築日乘一騾往督工或躬負畚以身先衆益奮鄉里有事爭端輒就江濱綠樹下判決之暮年而隄成民大悅頌聲騰野先是隄未成時每春耕鄉民恒爭水起鬪有夏長腿者因決隄誤以鋤開斃一人案詳於府童守以故殺定讞鴻儒白其冤彙隄成案通詳撫藩臬各憲獲平反童守銜之興安總鎮有數兵竊村民蔬果被毆弁目挾勢往助民控縣立捕其兵笞而解送鎮且牒言制兵侵犯農家物罪有律且少民敵多兵兵當勝卽不勝亦罷卒國餉參此輩何用請革黜總鎮惶愧無以答縣俗民間買田房不納稅鴻儒申令謂契領自官稅供於國匿者治如律甫一月全縣皆投契稅至出前明舊約爲易國號而鈐還其人年滿應調因前任係同鄉虧官帑鴻儒爲彌縫其闕凡署十七月始調省

奉委充西城門總查爭辯湘與庫平大小折合不均舐觸上官前知府童兆蓉乘間白巡撫遂以氣質粗疏奏參革職乃賃北山荒地收羊種麥勤耕自給十八年隨扈兩宮幸陝明年回鑾因祝嘏案開復原官歸原省補用三十年長春赴伊犁將軍任過陝召鴻儒辭不去函詢新疆形勝回書數千言規盡切實乃以千金報其家奏調隨營差遣勤辦奏牘歷充新疆屯墾局督辦武備學堂總官管保奏知府旋以在事出力人員分別彙保鴻儒免補知府以道員留任調奉遣旨依議宣統元年長春陞任陝甘總督鴻儒病卒於伊犁將軍署內派員護喪至西安民國七年次子淑玉辭警察局差扶柩歸葬視冠服腐而顏色如生鴻儒長身骨立目爛有光而精神煥發冬不衣裘與人語謙冲自牧遇上官輒傲陵轢不少屈故所如不合著有經史算術細草新疆地理志樂畊堂隨筆

周興基傳

尹之任

周興基字鴻圖邑西走馬場之西溝人貌和內毅明於禮義家平中貴自憾早歲失學無名壯年入粟爲太學生凡場上大小公事皆與聞之一日湖廣會館

召紳士鑒核賬目興基後至將入席適有一犬曲身臥地礙於步庠生某叱之曰出去出去蜷起在此做甚偶罵犬而實無心也興基疑以爲有意嘲己爲捐生隱忍焉席散歸家語諸子曰我今日受氣此後願竭歲所入爲讀書用汝曹須爲我發憤不成名不休遂距宅旁半里許新築瓦房書館命諸子居宿於外俾得專心讀以重脩聘名宿陳柏堂先生教授禮儀周至專雇一僕供使喚膳食豐腆甘旨不使有缺數日必躬至館陪食或接至於家饌加潔焉年節迎送餽遺有加十二年不少懈蓋誠敬而非虛文也某年夏走馬場來高價班興基往請柏堂率諸弟子往看劇館距場僅三里柏堂辭肩輿徒步往午後暴雨及霽柏堂先回館因路滑解履行偶失足撲地泥污衣襟身固未傷也興基聞之越日卽雇工修石路自館門達大道約里許又一日接柏堂於家飲適雇工作竹輿成柏堂見而稱其製佳飯後卽以此輿送於館中贈之又興基所著黑羔短裘毛淺而輕柏堂贊焉興基卽製新裘白衣之而以舊者贈柏堂使不得卻其敬禮之誠類如此柏堂感其意故施教於諸子倍殷諸子天資本庸鈍因師

嚴督學日進後竟爲性敏者所弗及長子爲理家三子因病輟學次子士魁字斗城四子士純字全三學成均入庠食餼士純文名尤噪孫起鵬字雲臣亦遊泮開筵宴客興基皆躬受人賀人以爲果如諺語敬斯文得斯文之報云

陳汝文傳

龐鑫溶

陳汝文字花城清平鎮白鶴林人長身偉幹倜儻有膽略工書法善辯論以廩生任保正練團堵賊負鄉里望選同治酉科拓貢朝考三等時方會師攻江南敗東南州縣闕員以選拔三等改知縣汝文不肯出賄籤分廣西臨行辭其母舅劉某劉處士也問曰州縣親民官汝書生今數千里赴粵西治民將奚先應曰刑亂國用重典成敗弗計也其舅嘿然語人曰此子任事勇而器量狹恐不獲終也汝文至桂林謁撫臺問曩居鄉何幹曰練團讀書耳上台偉其言委署上思州地隸南甯距安南近自洪楊起金田健兒多從州民席餘威村壘自雄抗糧稅汝文至慰諭之從違者半乃選募鄉勇治器械捕首從者數人分別懲治有渠魁號小皇帝劫商運皮貨數千金爲安南國相採買物牒州坐索汝文

微服往偵其狀冒風雪出不意擒之將置獄而魁黨百餘人上公堂求保釋汝文宣言是鉅案甯輕釋卽釋亦應詳府吾爲若寬厥罪而糾衆罪且增將不汝曹利黨始散然猶環伺謀行刑則奪之去久無聲息除夕方烹羊張燈賀歲明且見渠魁頭懸城門上知府以專橫稟參被駁有南甯爲殘破區何得妄參能吏之語汝文益踔厲奮發相救討捕各村次第歸誠獨一村猶負隅汝文親督全隊往攻至中途染疫病卒汝文居官勤幕賓案牘皆自理而性好學雖每日必讀古書數篇書小楷數頁雖盛暑不廢州俗民訟兩造皆肩囊盛米豆麥黍之屬勝則投於庭輸之官敗則負歸汝文皆禁之故宦貧如洗不能歸葬先是兵部尙書鹿傳霖時令鄰邑汝文曾爲媒與同僚訂婚至是稍賻助之後二十餘年傳霖督川秋巡過縣境汝文季子投詩謁行館拒不見今極貧田業售盧氏久矣廉吏真不可爲哉

王鏡泉傳

王錫鑽

王鏡泉官名懷清幼英敏有異才既長就職州判分發直隸以辦海運功加知

州銜署理清豐縣事時山東濮州教匪王來鳳竄踞清豐屬之方塔集鏡泉設法募兵勇得四百人知不濟乃簡閱各鄉團丁激以大義皆悅服聽指揮遂率團首張同堂等分隊擊賊破之斬首二千級進攻武強鎮賊敗走追及於開州之滹沱塞禽賊悍酋薛金鐸由道府保舉以直隸州知州用王逆懼邀河東悍賊逼縣城夜三更城中火起譁且亂鏡泉戒守城者嚴備勿動須臾禽奸細七人斬之亂定火亦熄次早賊以大礮單攻城鏡泉督團勇奮力奪賊礮轉以轟賊賊退走羊兒庄隨督團圍之王逆由水竄逸去竄飼鶴池適開團勇亦至乃分三路進剿河東賊幾盡復督團進攻山東屬之黑水巖生擒賊目王來彪大帥入告加鏡泉運同銜王逆勢蹙退踞濮州鏡泉力請大帥檄大名知府會兵合勦既至鏡泉身先士卒攻濮州入其郭王逆情急求撫鏡泉不許賊轉請於曹州總鎮郝上庠竟許之並飭清豐各團撤兵妄動者斬山東大吏遂以濮州就撫入告郝受優獎鏡泉既歸縣語團衆曰賊急而求撫旋必叛矣君等宜設備越數日王逆果叛焚掠如故鏡泉與衆盟分紮隘口遏賊來路賊使人假道

至河南不犯清豐一草一木鏡泉峻拒之忽接營弁信勸以稟明大帥乃進兵勿挑釁於強寇鏡泉忿然曰焚掠如此尙須稟明大帥何以地方官爲遂以死自誓翌日親率前隊與賊大戰自辰至午賊愈衆圍之數重鏡泉力戰受傷裹創再戰忽一礮飛來洞胸墜馬團目謝三模謝羣相謝德旺以身翼之並死於陳有靳存柱者負鏡泉屍突陳走身受七傷不忍捨團衆見屍忿甚戰益力王逆大敗奔還濮州附逆賊劉占考奔范縣而清豐卒以保全事聞諭照知府例議卹並於死事地方四川本籍建立專祠其同陳亡之團日均照外委例賜卹附入專祠亂旣平追贈太僕寺卿賜祭葬蔭其子秀豐騎都尉今北城有祠巍然卽其專祠也

周作人傳

張汝翼

周作人字輔臣縣東街子鄉人幼聰慧長於記誦塾師器重之父樸拙不能治生產作人年十三輒於課餘兼理家政致力稼穡二十入邑庠越數年食餼文名日益著館邑中南禪東山觀音諸寺所至之處靡不濟濟一堂稱多士焉其

設教先德行而後文藝遇寒峻力不能讀者伙助膏火俾卒其業爲人喜鄉居好排解人有鬻端力爲開陳喻以禍福必使調和乃已尤重慈善事業約本鄉富紳捐貲置田百餘畝爲十全會收養孤貧及施藥材棺槨晚近世道衰微人心險詐常集里黨士女於月朔設宣講於家以圖補拯更手選童蒙必讀書及士習要錄一卷刊版印刷散布鄉塾本鄉橋頭壩橋折歷十餘載僉以工巨不敢倡首作人毅然獨任鳩匹甃石成之近境雙新橋傾圮至再至三率衆迭補不畏難宅右一途行者甚衆恒雨後泥濘沒脛作人目覩心惻首捐重貲改造石路其濟物利人之舉於此可見生平自奉綦薄調恤親故略無靳色時訓誠家人以勤儉爲要子弟優秀者使之讀樸鈍者令之耕一家數十口長若幼各事其事以故家道寢昌田業愈增每於暇時躬親種樹卽今園林竹木參差鬱鬱蔥蔥皆手澤也性友愛兄弟不忍分居嗣因子孫繁衍廬舍難容始析炊季弟以不善理財致負債者三均爲償清毫無間言光緒季年時漸多故邀同志創修寨堡方今匪風披猖隣近居民恃此安然無恙保障一方其先見之明尤

爲人所難及年七十三卒於家

唐濟川傳

尹之任

唐濟川邑西德清里復興鄉人光緒二十年與其配李氏同晉八十壽縣尹何國璋爲之序曰西蜀古號益州其地多山岷峨華塗敦厚鎮靜有壽象焉而石照爲渝郡屬邑得磅磚鬱積尤厚其人之多壽也固宜夫人傑而後地靈苟非其人制行無虧足以銘金石而壽河山則天地之氣不屬而欲其壽也難然則蜀人之壽固不盡關夫山而其本於德也審矣仁者壽吾於封翁益信焉回憶戊子春承乏是邑耳聞封翁名雅敬慕之而恨未獲半面識今觀其節略訪諸輿論乃知家世積德其祖世麟公爲邑諸生冠家素封好施予父祖信公不佞不求雖有陳仲子之風而其性情則好周急雖草履芒鞋不以小善而不爲殆又過之至封翁懸弧時則家徒四壁王粲依人矣封翁幼嗜讀能文章屢戰童軍而終不得逞志以去舌耕十餘載暇輒談陰隲居無何封翁母陳太孺人病不仁聞召卽辭居停歸養侍寢嘗藥溺溲浣櫛歷八寒暑無虛日未幾太孺人

棄養封翁卒以母病故棄儒業醫焉今夫不善鍼砭術者不足知醫不存仁厚
心者不可言壽封翁易孔孟業岐黃古所稱飲上池水者非耶而又心存利濟
富人聽其酬不乘危索謝貧則一錢不受其困苦尤甚者不惟不取其酬直以
囊貲付焉鄉人敬禮之爭遣子弟執贄而封翁不以貨財爲禮必擇品行優長
者授之故雖門下士無多蓋惟恐俗學誤人貽害匪淺然則封翁之存心皇天
鑒之矣會其父祖信公逝其續配謝孺人翁封極備色養雖歡盡噉菽而病家
所酬貲必日市甘旨進以爲常此固執袴家所不肯爲而餬口四方者欣然行
之無倦噫可謂難矣嗣遭謝孺人喪殮祭如禮時蝗災斗米幾二千錢田主某
憐其貧贈窳窳一所封翁辭曰母事父久且無出我固無恆產時賃居主人屋
不歸葬恐後世子孫無掃墓者故雖家貧道遠年饑終扶葬於先人之墓吁事
繼母如此其事出父母更可知矣尤難得者封翁上有兄二伯乏嗣急物色服
內猶子作螟蛉伯病十餘年嘗市藥餌肥甘啖伯冀復痊會伯卒與嫂相繼逝
撫螟蛉子如已出時存恤其家稱小康焉方仲病之彌留也以後事囑封翁沒

後遂迎嫂及子若孫歸同釜炊衣食皆身任居無何居孤聽人嗾再諭之不聽乃給貲別居冀其悔悟將復合未幾仲子偕人適黔病歸舌強手足拘攣復雙眸就瞽仲孫將棄他適封翁乃攜諸其家衣食之又爲仲孫捐金買婦比隣居焉封翁行事大率類是夫觀人者居官則取奇節居家則尙庸行不知庸行之中奇節寓焉封翁之謂矣獨是樂羊斷機共稱內助伏龍善策賴有賢妻德配李孺人者鍾禮郝法年及笄歸封翁無非儀上事翁姑無不曲體封翁意事無大小悉咨稟後行惟恐感傷故翁姑亦愛憐之嘗曰汝孝順如此吾無田業以遺汝夫婦但願汝夫婦得賢子孫其孝汝夫婦更甚汝夫婦之孝我二人也翁姑於戚里間嘗絮絮不休皆此等言媿妯由是共嫉忌之而孺人性安退讓凡話諍悉以好言慰解不與校又素勤苦凡媿妯及諸侄婦未完之事無不贊成以故羣賢之無間言其心尤慈惠凡族中疾苦樂分潤焉來家無尊卑必優禮待寧不食食人其心始安待里黨亦然會族中有孤兒父死母再醮室罄懸孺人言於封翁收養其家凡撫育補綴皆手操不啻爲已也孫者嘗諭子婦曰若

輩勤儉分所有以恤孤寒勝拜十年菩提也今孺人雖老年而黎明卽起督輩婢家衆操作終日不懈以故其家自始有以至少有而富有將不卜自至矣子三長虞盛耕樵漁讀市廛不一有朝川遺意焉仲際盛邑廩生卽余乙酉分校所拔士聞其幼貧讀書大爲儕輩白眼而封翁暨孺人笑置之培植愈堅以故刻勵益苦稱宿學焉雖屢薦未售而據其世德造詣終合破壁飛去若妙年冠軍補弟子員之斯盛者則爲之季也今甲午鄉闈岷仲皆房薦其兄弟同榜已預兆焉女一適王氏孫四聞皆善讀唐氏之福蓋未艾也余宰是邦七載接見唐生歲無幾時而唐生亦非以文請質不至室坐談只風月無一語及他事吾以見賢唐生而益信封翁及孺人平日爲人與其德教有以致此故余雖未獲見其人而於其子之守禮知其梗概然則獲福又烏可量哉夫人極力以營其口腹而所得祇於一飽極力以營其居處而所安祇几席地將焉用之人生貴適志耳茲積累雖不及陶朱而已無饑寒之迫子孫雖未爲卿相而已有廩祿之頒况結褵偕老而又矍鑠康強坐視子若孫致身雲路雖陸地行仙不啻也

予雖身膺民牧有餘慕焉然則封翁暨孺人壽以數乎壽以理也理在而德在是矣予久未拈筆又不獲以不文辭竊願覩是序者無徒視爲祝嘏常談固將以廉頑立懦而非以供騷人逸士之娛也故用是爲封翁及孺人壽爲唐生昆玉勉而並爲邑人之修德獲報者望焉濟川後於光緒 年卒越 年李氏亦卒其子際盛旋出貢斯盛補廩孫曾輩或於中校師校畢業家聲蒸蒸日上矣

高光煒傳

張汝翼

高光煒號映軒河東長樂里人父陽愷知書光煒束髮受庭訓日誦數百言年十一失恃事繼母以孝稱時上有二兄仲兄光燦天姿過人學未成早卒父悲勸謂光煒曰汝不成名吾死不瞑目矣光煒因之讀益憤年十六畢六經雜及唐宋詩文自爲時藝已清通逾年其父歿以人事坎坷復遭歲歉遂累債迫而棄產長兄光灼又抱沉疴不起糜費日繁家益窘出就外傅一年遂輟業兩試不利藉筆墨餬口四方無意功名於是不赴試者十年或謂曰爲人課讀而不

應試其誰信之光煒笑曰學問優劣豈在科名之有無耶其人曰風塵中知音無幾子盍從俗光煒乃復就試旋冠童軍補弟子員以優等列增年己三十五矣而筆耕如故其爲文理法清真力黜浮靡之習尤嫻詩古雜體從遊者歲數十人得其傳捷名譽序者濟濟平生著作甚夥惜稿盡散佚晚年以脩脯之餘置田數畝築草廬以居爲人誠懿端亮言動不苟尙氣節重然諾不爲勢屈不爲富諂可取不貪富與不吝朋友交遊淡而能久數十年身未嘗染邪行足未嘗入公門士林尊重之光緒二十二年卒年七十六

唐名拔傳

王錫鑽

唐名拔字仕甲別號禎元幼業儒能文章尤精易理既長勤儉持家家益富每晨起必朗誦朱柏廬先生治家格言一遍然性好推解族有貧者卽出貲使佃田爲生計每年夏必以穀借農家秋穫收之不取息佃戶納租亦從寬讓免更延聘名士訓族人及貧家子弟而對於姻戚朋友並任俠有肝膽其內弟馮某家中落攜子女依之名拔代伊置田業二十餘畝無難色亦無德色其次媳父

蕭大龍初任定遠專城汎旋以功陞合州汎既而隨征髮逆陣亡家屬無依名拔延至家使其子偕談幼孫讀卒以蔭襲登仕版時同儕郭某新中鄉榜北上乏貲斧名拔聞知贈程儀四百兩郭遂以是科成進士咸豐十一年滇賊擾縣境名拔築一寨聚族人及鄰里避寨中貧無食者皆獨力任之十月賊大至附近靴子巖圓山寺二岩皆爲賊破名拔得衆心賊屢攻屢被創遂縱火燒寨外居民衆觀火燄衝天皆大哭名拔急止之曰賊假此以亂衆心耳奈何爲所愚且房屋旣燬哭何益事後我爲若輩修復之衆乃喜賊見寨中鎮靜知不可犯遂捨去亂旣平名拔爲受害者復修房屋而資以錢穀感恩者皆請其手書神榜以爲朝夕焚香見其字卽見其人至今猶有存者當乙卯大旱名拔出倉粟千餘石減價糶之市價頓平貧民受其惠於冥冥中曾不之覺名拔亦不求其覺也名拔於通衢道路壞卽修之不借助里人亦不豎碑其他如施寒衣濟米藥材棺板推而至於培廟宇創義塚興義渡皆昭彰在人耳目晚年嘗集境內男女講善書格言鄉人感化無惡俗將卒命家人取積年券盡付之一炬數約

九千鋤卒年七十四子孫蕃昌有由來矣

馮啓中傳

張恩溥投稿

馮啓中字庸齋邑歲貢生家烈面鄉其人身軀偉壯面圓鬚髯下垂長二尺許見者莫不敬之若神鄉居擁皋比四十餘年受業者以千計如周冕蔡傑周作藩陳汝勤段貞吉張懋煦聶燦輝張子貞萬邦彥萬席珍王紹柏聶天祿陳善陳明玉及其季子景春皆先後補弟子員清光緒十六年四川總督鹿傳霖履新路經縣屬之走馬鄉啓中以老貧拜謁道左鹿驚曰此天人之表也令呈履歷查驗卽補內江教諭啓中蒞任全縣士子爭師事之內江知縣楊增輝知啓中品學兼優亦屬其子就學署讀所在爲人尊重老年回籍享壽八十四歲人以啓中父隆炳年八十六堂兄啓茂年亦八十四其壽蓋有種云

劉培基傳

張汝翼

劉培基號貽棠昇平里新鄉人蚤歲失怙家僮中費無力雇僕役躬親服事孀母李暇卽取書讀之異常勤苦年二十二入邑庠次年幫增後遇科歲試屢列

超等爲人品學兼優視聽言動準之以禮工書法本鄉廟宇楹聯匾額多出其
手所書字自成一家常語人曰吾每日侵晨盥漱畢焚香拭案靜坐齋中覺紅
日射窗花香撲鼻興到處伸紙濡墨腦中別有一股清氣拂拂從腕底毫鋒中
躍出此時渾忘卻魏晉何論唐宋是蓋自得之語非誇也光緒初知縣梅震煦
實行保甲法令各場公舉保正一人鄉人以培基公直端正稟請充任在職數
年募捐積穀以備荒歉倡興十全會以賑孩貧爲地方謀公益佗尤甚夥年五
十餘卒於家

唐明斗傳

尹之任

唐明斗邑西復興鄉人業農佃耕自給恒以先輩失祖業爲憾思力復之服食
器用務從節儉每日鷄鳴卽起督子婦耕作夜深必周視廚竈門戶而後寢其
於年月之早潦時日之晴雨以及土地之宜黍宜稻栽種之宜早宜遲皆若有
獨得之奇法每作備驗無忒由是所獲較他人常豐積有餘貲贖還祖業上庄
之日遂將其曾祖七十壽匾兩方洗刷輝煌之復懸於堂卽昔售業時所遺下

者也繼又續還祖業一處邑令何國璋見其契紙書珠還合浦字於契尾以獎之至九十生日卽將此四字刊匾懸於復業之堂以爲紀念其爲人樸直忠厚凡有人借貸不需酒食不索重利償時請減息金亦許之有不能償者則焚其券不復問購貧人物則重其值人或笑之意豁如也存心之厚大率類是惟不甚喜讀書每言嘗見人家子弟一服儒衣冠卽習於文弱不能操作營生計甚至行動需人因而有家者致於敗無家者不能興故於其子孫僅令粗識字能書帳而已未免因噎而廢食然家庭嚴肅講孝弟重禮讓尤篤於宗族嘗有伯叔五人因失產析居衣食不給歲時周之死則給以衣棺葬之美地其行事合道有爲讀書人所弗逮者其貌頽古鬚長齊胸色白如銀有壽者相曾眼見子孫曾玄匹代清光緒間學官採訪邑中耆老以名上聞得錫八品頂戴鄉人榮之壽至九十三歲而卒

段材岑傳

王錫鑽

段材岑名盛能家號素封生甫彌月其父瑞卿卽見背材岑垂髫時孝思肫摯

稍長益謹事孀母其時祖母尙在堂材岑痛先父未能終養以慈孫完孝子之職能博其歡心愉愉然忘其喪子並忘其老且衰也材岑有嫂氏周青年撫遺腹子心敬慕其苦節善視之撫孤姪如己出無何姪又逝所遺孳孳雙雛又撫而教之生平好施予每歲租入豫計家之所費餘皆分潤貧人創十全會以濟其窮興平糶會以拯其阨而猶慮愚頑不化人理之或亡也則校刊孝經四子諸書散之邨童俾就學義塾中以端其品與行至其應事接物一衷諸禮未嘗作疾言遽色人無親疎皆敬之有喧呶不已者聞材岑至則肅然及卒有甃踊墓門而哭甚哀者其爲人蓋可想見矣

段昆山傳

王錫鑽

段昆山名邦輿別號德輿少讀書明大義長好施與嘗倡興十全會歲捐重金作濟人利物事每值荒月必發粟賑貧窮秋成則語族人曰富者貧之怨也我輩家號素封少攜幾十斛自多幾代平日尤當惜福有餘用周鄰里鄉黨非特培陰隲亦所以釋怨也族人感其言遇善舉輒慷慨捐貲無吝色段氏好施之

名遂爲邑中最邑令聞其名有大役必延致商酌昆山潔己奉公補修聖廟改造文場均規模宏敞而費無虛糜無浮報猥鄙者心滋愧焉繼乃籌設義塾俾窮貧子弟皆得就學晚年值鄉試慮寒峻無力備卷價每獨力捐之其扶持文教推之彌廣固不徒虛襲禮文已也咸豐軍興時以輸財助邊功擢軍糧府同知昆山仍謙退自守教子訓孫以上壽終於家迄今後嗣蕃昌方興未艾云

王若周傳

尹之任

王若周邑北石盤沱人其生平事蹟清光緒甲午歲邑廩生唐際盛爲作家傳叙之綦詳其文曰公譜名安勳字若周其職篆則應元也行四爲玉璋公續配黃太孺人出先公有同母兄安貞十四齡試卽前茅方期捷步木天無病不起玉璋公及黃太孺人哭之慟視公愈珍重公因是益勵於學得書中大意內而修身齊家外而處世接物雖不必盡踐古人陳迹而無不與古人暗合其穎悟殆有過人者矣居家黎明卽起督僕婢家衆操作終日不怠率爲常事皆親裁羣小以是不敢欺方公之析箸也受田六百畝至是購至二千畝有奇苟非生

財有道烏能如是初公長兄奠山逝公撫侄廷尉如己出無何廷尉逝撫姪孫輩尤加意體恤後姪孫又相繼逝公益惻然惟恐有欺人孤兒寡母其處心積慮殆不可言狀矣尤足異者公長兄奠山逝後凡事皆公身任無何公仲兄夢齡又返道山遺子廷璵未幾廷璵又歿謝嫂老媳孀孫孤且幼直無異長房矣事無大小皆需公親裁才人多勞公之謂矣他若撫族孫汝璧遺孤猶其一斑也然此特施於一家者也至若定宗祠章程歲延經師教讀族間子弟人給脩金錢若干縣府院鄉會試人幫贖儀錢若干則推而廣之矣然由一族也石鎮募設義學創興文課字課添設義渡義塚以及凶年舉辦平糶兵警監修砦堡則流澤遠矣然猶一鄉也前沈主扎委勸辦積穀今又奉何主委辦團練育嬰學田則公之所爲豈但一鄉沐其惠哉一邑利賴之矣歲公晉大理寺評事六品銜爲玉章公暨黃太孺人請五品封典報親恩也亦激勵諸子奮志青雲之意生子七長廷寶詹事府次廷賓戊子縣試邑侯何公以進士宰是邦賞其文拔取案首府試後病卒原配朱孺人出三廷家業儒試輒前茅將卜爲遠到器

四廷宗五廷官六廷寬七廷寅俱幼讀續配周孺人出五鳳八龍余將爲羣公子望焉今公年雖康強已七分業產使諸子各取其一其深謀遠慮尤有不可及者女十一均玉立孫六偕諸子讀王氏之福蓋未艾也余館公家十二載悉公事故得概從實錄以俟後之採風者按際盛作此傳時若周年六十後三年若周卒距今三十餘年矣鄉人每談其軼事猶稱頌之弗衰且厥後克昌日益殷富有子廷寬字敬敷孫號有容者尤精幹善練團禦匪保障一方咸謂爲若周之積德所致云

曹宗圻傳

張汝翼

曹宗圻號玉山邑北新鄉人博學能文不利童軍因例入國子監太學生性至孝母李氏年八十六能終身孺慕有弟三友愛異尋常尤喜施予好排解鄉有十全會顏曰永濟生由宗圻首捐巨資倡募成立置田若干畝凡藥材棺槨泊一切賑救事宜無不盡力爲之里黨有爭端得數語立判年八十二卒於家弟琮琬號玉成爲人亦如宗圻而重道愛士則過之享年九十六姪祖訓號心一

恬靜寡欲不與外事夫婦同庚壽均八十五今祖訓仲子聘三年又晉八旬矣身其康疆不亞乃父人以箕疇五福將萃曹氏一門云

袁鴻志傳

王錫鑽

袁鴻志字含英別號仁山天性純孝年十五失怙善事孀母歲餘母病革日夜侍左右時滇寇朱何擾境人皆逃匿鴻志守母不忍去賊至縛而詢之得其情釋以去越日母卒哀毀守制不以亂離廢禮同治辛未歲大饑其叔生齒繁窘甚鴻志仰體父志分粟食之繼又讓以產業有婚嫁仍特別伙助數年叔家漸裕鴻志無德色居家尙嚴肅婦孺僕從凜然不敢犯子璧城已入泮督課綦嚴及中副車始稍稍寬假出入鄉閭間公是公非鼠牙雀角恒待其一言解決四旬後喪偶守義不娶有餘貲輒以濟人饑食之寒者衣之並施藥餌棺板以惠里中窮民其宅旁固近大道日給草履暮予燈籠歲以爲恒無少間晚年爲善益力日手編字箋刷善書送人而合定兩邑之十全會平糶會皆捐重金以成鉅欸迄今慈善款猶利賴之年七十一精神矍鑠一日讌集族戚話別曰吾某

日當命終某時當出葬至期果如其言家人異之而莫能測其故也

段千之傳

王錫鑽

段千之世居德清里性剛直清光緒時爲里人所公推歷任保正團長公是公非人不敢干以私有冤誣必力爲伸雪餽以金錢絲毫不受且曰職務所在而不肖者輒視爲歛財地何以團保爲清光緒丙申秋淫雨彌月穀盡霉每石僅有米二三斗翌年知縣羅錫璜欲換濟倉穀爲新穀乘穀價昂甚美其名曰平糶札飭各團夏發而秋收之千之愀然曰發霉穀而責償完穀是剝私而肥公也貧民何以堪此但霉穀不出嗷嗷者又無以哺之無已遂改糶爲賑盡出濟倉穀以賑民而別立募捐薄募其族及所屬六場之富家或十石或數十石秋收後就近填倉尙餘穀二十餘石仍交倉正存儲存案備荒歲是舉也倉穀固易陳爲新而貧民亦不受虧折且獲補助千之急公好義大都類此子松垣補廩膳生任高小校教員亦屢充保董團正有父風焉

孫自揚傳

張汝翼

孫自揚字顯名號易才縣西仁化里人幼失怙兄自昌亦弱冠卒理家政蚤讀未成名事其孀母以孝聞教養孤姪成立逾於己子姊一適段氏貧曲承親志歲飲錢穀終姊之世乃己性端嚴尙勤儉家人無敢邪辟奢惰族中有不肖子弟常遭詈責然容人悛悔未嘗宿留於中故咸敬憚而怨讙希遇鄉里大故輒爲斡旋清咸豐十一年滇逆擾境避亂平安寨一日有賊二三至附近覓糧同寨舒賢敏昆仲勇而羸窺賊寡潛縋逐之賊思火孫自正居廬而逸自正弟兄亦羸猛忿向賢敏等索賠各尋干戈寨事將債自揚多方調停得以寢越日賊大股圍寨下聲請獻昨逐己者否則攻破不玉石分寨人大恐無以爲計自揚奮然偕申某立垣上呼賊目語巧爲駁辯詞婉理優賊衆信服解圍去寨得保全人以是敬重之其他排難解紛不辭艱險類如此而泯矜伐卻酬報尤人所難能也平生不喜浮華獨樂與文人相徵逐歲進士胡國標之子增生胡耀川以女字其長子興綱往來款洽較他戚尤義重情濃有孫名國藩者耀川之女所出也少時自揚含飴玩弄口授以書六歲遣從師學暮歸輒燃膏監讀案置

短篋簽聲言渴睡則以簽撐目使弗得閉必熟誦乃寢率以爲常時其姪興澤亦有子讀書出就外傳多不便乃商同設塾延師宿儒周家儒胡良傳胡達道各館於其家數載最後陳焯受其聘由後秀而茂才十年未易焉自揚家中中費自奉從約而供師膳務求豐潔朝夕恭陪惟恐稍致簡褻凡師之家屬朋友偶造其廬靡不具雞黍隆禮貌曲盡歡蓋因敬師而及之也束脩厚備往往先期奉送其尊師重道一時里人豔稱之故貢生周冕廩生周作藩增生張懋煦胡德馨附生蔡杰段貞吉陳文淵胡再成均時與之周旋尊爲鄉先生遠族孫之緒住合州因采芹來索宗祠幫欸族衆以其字派改易從未入祠祀祖嘖有煩言自揚力排衆議照例支給曰培植子弟何事苛求乎光緒二十一年國藩入泮隨丁外艱自揚飭其於守制中求深造圖遠大舒某約國藩協控均平會總管知之怒立召回家強令設帳不許干預訟事國藩能守忠厚家風自揚教之也爾時本縣訓導郝鄉重其爲人爲之請於上峯得給八品耆員人有勸其開壽筵徵題詠者應之曰人之善否蓋棺後自有定論祝嘏虛詞奚用哉其持

論亦卓已垂老精神矍鑠鬚長至胸見之者以爲美髯公居恆看書飲酒悠遊
林泉以爲樂地方公益事件猶時出而維持不改少年行狀焉光緒二十八年
以疾卒壽六十九前署內江縣教諭邑歲貢馮啓中爲題木主私諡端肅後二
年國藩食餼又二年科目廢止以考職列一等巡檢籤分雲旋署楚雄府定遠
縣典史論者謂爲自揚重文之報云

隆運昌傳

張汝翼

隆運昌字少呂祖籍沿口清同治中徙居爲飛龍鄉人家素貧父吉安販紙爲
業母毛氏有賢德生子三運昌其少也生而穎異凡冬溫夏清昏定晨省及隅
坐隨行諸儀節不學而能童時就塾師讀春元毛先生輒奇之長從邑舉人彭
玠學文章立言精采構思敏捷爲同堂友輩所不及其時生計益迫負笈歸餬
口四方畫課兒童書夜則篝燈兀坐取經自讀仍間作題文一首親詣師館請
改正焉年二十二入黌宮光緒十五年己丑六月應歲試考例優等以廩無缺
額未補是年七月彭玠病於家運昌往視之彭謂曰子其補廩無疑運昌不解

曰先生何爲出此言也曰吾殆將死矣廩且有缺運昌聞之意甚不自安未幾彭果卒彭子定科以廩生丁憂缺開運昌應補遂食餼二十一年歲試學政瞿鴻璣性乖張運昌因保新鄉武童賀恆升覆試遺疾力頓減鴻璣疑其縱鎗牌示永不准出保故後運昌於歲科試僅投考而已二十五年夏六月山東吳樹芬督學臨重慶運昌往應歲試半道聞母偶嬰微疾星夜奔回疾愈不復往或勸之運昌答以功名事小不孝罪大人服其言運昌生平自奉極薄養父母不敢從簡距宅里許有屠案日往市肉以歸或問其故曰吾父母年均七十非肉不飽如是者有年忽一月之間兩服斬衰哀毀骨立葬祭盡禮服闋弟兄不忍分炊處館數十年所得修金概作家用毫無私積而訓徒必先德行文藝次之三十年提學鄭沅考試渝城運昌援例入爲恩貢生由提學報部注冊候選直隸州通判宣統間卒於家年五十三

曹應選傳

曹守文投稿

曹應選字獻之昇里新鄉人爲邑附貢生讀書明大義不喜爲詞章嘗曰學以

致用何琢章鏤句爲因集邑紳釀金至富順糞鹽孽畫有方致金不貲迄今邑人知爲糞鹽業自應選始清光緒中鄉人推主保甲事以公正剛直著鄉固距城遠有捕役某素狡點欺鄉民趙九芝等忠樸僞爲官牒誣以聚賭不法九芝等駭極賂數十金求緩頰某不許又不卽行械繫九芝等野寺中橫施榜掠應選聞之忿然曰九芝等得罪情實自有宰官案訊若輩何敢爾爾遽詣宰白某不法狀情詞激切宰爲動容立逮某下獄死九芝第得釋感應選甚至酬以金力却之九芝等乃贈質直好義四字匾額於門今尙存

胡夢麟傳

尹之任

胡夢麟譜名官俊字克明城西任婆橋人其曾祖大貞誠樸渾厚初受遺產僅山土一幅茅屋兩間後以力穡起家置田二百畝有奇傳其祖心文克守先業至其父南康置業加廣力行善事生克明幼穎慧喜讀書清咸豐辛酉以僉生入庠是年五月滇賊圍縣城賴其父南康練丁勇據守南禪寨以牽賊勢待官兵來援而城得不破人以克明入泮爲其父善報焉後入秋闈房薦未售旋捐

貢選教職歷任梓潼屏山大邑三縣所至之地學風丕變及選成都正教授適病作不克赴回籍調養旋愈不復出奉母至八十八歲爲請旌誥封更爲子孫聘師督課所謂退而養親教子者與晚年尤好山水遊每扶杖尋幽意有所得卽發爲詩歌歸而筆之積久成帙惜未梓行年八十六卒長子清高業儒早歿少子清遠爲邑庠生孫曾衆盛皆能不墜家聲云

蔣如蘭傳

張汝翼

蔣如蘭諱宗成號芝三邑街子鄉人性敏慧貌魁梧幼承庭訓好學不倦長從遊李春江及北村兩先生之門德行文章擅長一時年二十四入邑庠五十四食餼六十七援例入爲廩貢嘗於宅前闢地數弓爲作育人材計脩金多寡不較尤喜拯救貧乏如蘭伯姊適李姊夫及其長子均散於外室如懸磬莫自給如蘭爲養其家者五年未幾姊夫卒旣全姊節復庇蔭其幼孤俾之成立後有侄曾孫女亦遭閔凶孤窮不堪又收育於家以待字遇族戚或鄉鄰有鼠牙雀角之爭如蘭至則一言以決其人品誼學問心術資望求之里黨洵不多覯亨

年八十卒於家先是清光緒二十八年冬如蘭年適七旬其自叙小引有曰撫
身世之匆匆年華易逝帳予懷之渺渺心事乖違往不可諫來猶可追宣尼垂
訓示人患愍自書貽後聖賢遺軌予弗敢希惟追溯往事書之以當暮鼓晨鐘
遂爲七律十首詩云人生七十古來稀此語傳今似是非百里入秦方顯相太
公釣渭尙遲歸從心有矩休板附屈指無多感懷徵安得魯陽戈再返同袍還
與賦無衣暮齒無心尋鶴俸責燈有味似兒時前三十幾夢中句茲八旬開箇
裏知自信靠書來度日何嘗斷酒去工詩揮毫欲寫哀情事未握記珠已尙疑
謗字無端入夢來細參文義甚徘徊平生未到精深處茲事難憑擬議裁誤我
聰明真不淺催人歲月那能回從今有錯應須鑄莫待臨時費忌猜坟上草青
王母語堦前蘭翠小人思含飴尙記弄孫樂食報未曾後裔知世父特珍驚穎
異家君過望作英奇如何本末後先悉此日仍然老大悲文筆鄭公清爽評成豐
丙辰如蘭入泮學使精神團結盛公行光緒丙戌補廩學使堪嗟三十年前滿又作
鄭丹九批文筆清爽精神團結盛公行盛炳緯批精神團結堪嗟三十年前滿又作
一千里遠程泮水采芹亦似蚤廩人繼粟已生驚如今貢樹分香下可有青藜

照讀明瞿公尙憶作文宗告進中門發落恭時則六旬有二下人誰少許勝多
供敢矜扼要論真立尤服泛談批不鬆果備氣清詞暢教秋闈十月歲寒松

光緒

癸巳考列優等第五名學使瞿子玖批扼要立論以少許勝人多許又批多泛椿頹諉委剩寒松作箇詩人意也慵讀聖賢

書何所學忝衣冠列渺無庸平生好事都成歹素夢淡時總際濃修到梅花清
福享孽緣勿再與相逢前身原是大羅仙謫到人間七十年自理夙根從小
殊憐結果一華顛廣文末秩何嘗就習武次男每奮拳如使長生誠可學優游
頤養話林泉女嫁男婚問子平尙餘兌索未粧行相攸悉是乘龍彥伏櫪莫非
老驥情詩禮傳來昭世澤門庭顯去振家聲人生事業知何限椒衍跌繇取次
賡天地君親師位崇非從五者總皆空身家性命全叨佑富貴功名半折衷成
我恩深生我等爲人本務與人同不知老至正云爾迂拙無能是此翁

冉壽祺傳

孫國藩

壽祺冉氏字吉五縣西烈面鄉人父東山績學未售微業罄典清同治間挈眷
徙遂寧縣業代書因僑焉壽祺幼讀書敏慧絕出東山語之曰吾窘於遇迫以

刀筆捭貧此平生憾事然屢勸人息訟未嘗欺心捏詞當不爾累也爾其勉旃
圖遠大壽祺恪遵庭訓好學不倦弱冠回籍應試得補學官弟子員會莊子佩
署理番廳耳其文名延任教讀書啓凡十餘年壽祺品學俱優莊頗禮貌之莊
遷灌縣水利同知補修二王廟壽祺爲作碑記大筆淋漓傳誦一時蓋壽祺蠖
屈幕府公餘仍操舉子業功名之念未嘗去懷故文字與年俱進當日士習專
攻八股類多失之空疎壽祺則寢饋經史腹笥便便年獲館金除贍事畜外有
餘悉以購書幕遊綿竹官廨時購書數十種耗二三百金焉胡介春知湖北南
漳縣聘壽祺爲西席文章道德並播鄂郢間光緒辛卯科領鄉薦一返梓里拜
謁族戚長老謙抑敬恭人咸謂東山陰行善宜有子矣次年春官不第留京自
習東昌府太守洪蘭楫敦辟入幕旋因勞績列運工保案以知縣用而尋祺終
繫情科名乙未復上春闈尋病卒卒之日奚奴竊款潛逃同鄉京官郭燦等欽
其爲人醵金棺殮長子鶴年在籍聞耗赴京已故遂扶櫬回葬於故里壽祺廉
介自持以道爲重官吏爭迎從未趨炎附勢故身後家無餘資而鶴年爲父喪

葬盡售祖業弗之惜亦克肖也鶴年服闋遊泮旋居烈面鄉壽祺遺書手澤聞今猶存

孫子曰壽祺吾鄉先達領鄉薦時旋里讌客吾初偕鶴年應童子試因得與焉瞻厥狀貌頽而蒼溫然儒者以其學問經濟苟得志施於政事游刃有餘顧卒困躓殆有遺憾歟然鶴年克讀父書家雖落而遺澤尙未艾也

李樹春傳

尹之任

李樹春字厚菴城內人民國三年死於匪署理四川民政長陳廷傑爲其墓銘曰李君厚武邑才士也家貧幼孤節母楊女士劬辛撫養甫齠齡卽警敏絕倫名宿器賞資以膏膳俾學爲文母氏亦以紡績佐讀君遂淬厲以能文稱未幾入學食餼清光緒丁酉舉於鄉而節母以貞順見旌揚名顯親出諸寒窶洵有特性者也獲雋後家日以裕三赴禮闈僅選臚錄前邑令羅錫璜何承道均欽其文延主印山書院講席列門牆者蔚爲時望兩次被選爲省會議員後以朝考得鹽天使分陝西省候補未赴民國初成秩序大亂盜賊蠭起縣知事張公

光森知君能治盜深相倚畀君慨然以澄清爲己任於城設團練總局募丁勇勤教練聞警馳勦動合機宜屢殲渠魁么醜懾怖惟臨事不讓衆嫉歸之羣小乘間竟爲君禍白龍魚腹困於豫且其命也夫然因公殞命大府褒獎以桑梓干城匾額雖死猶榮卒年四十有六葬於立石下文峯峻秀顧瞻稱道靡不嘆惜今後無是君也君初配氏陳生子書成書榮繼配楊生書富皆頭角嶄然不愧令器楊夫人厲志冰霜事姑至孝而節母康健如恆克享高年君當無歎於九原矣夫以不世之才負一世氣攻苦食淡卒能成名以榮其親以長其子孫且樹功鄉邑爲鄉人死其人不足傳乎書成爲父修墓功竣丐余誌之因據事直書不敢溢濫其辭懼無以信於今而傳於後也銘曰奇特之生迥異凡庸亨乃由困窮且益通張施聞譽懋集事功有進無退死魄猶雄嗟彼豎儒愧汗溶溶

唐際盛傳

尹之任

唐際盛譜名德新字子又號鼎三邑西復興鄉人唐濟川之子也濟川自有傳

際盛性穎慧幼從村塾師讀貧甚不能具膏火方十齡卽輟學業農已三年鄉先生王鶴皋過其家見其字秀文清愛之語其父使從遊不取脩脯際盛從之攻苦三年學大進卽薦之館於河東富紳家俾教學相長弱冠後入邑庠旋食餼鄉試屢膺房薦文名噪一時何藻卿譚葆崖兩縣令暨郝次封學師均器重之後留學渝城東川書院山長景旭林趙堯生趙文煒渝郡書院山長何符九亦咸目爲遠到器無何科舉停廢無由進取僅以歲貢改選縣丞歸家待次邑令何璞元重其品學聘爲邑高小校校長旋辭去歸理家政常教子姪各勤職業以詩書禮讓稼穡三者爲祖宗所遺不可不繼述之暇則取少時所讀子史及古詩文摘其粹者手錄成卷以餉諸子弟嗣爲勤學員月至各鄉勸導各校教員學子莫不敬仰惑化爲勤謹平居寡言笑而待人則本於誠鄉黨有雀鼠爭不憚懇切排解期無訴訟心始已然不美事則掩耳不聞與同流合汚者有別臨財無大小必辨之以義取與不苟自身服食力崇儉素待客則豐腆而於宗親尤篤嘗憐其從弟及其孫子女三四輩貧病孤苦無所依乃稟商於父母

兄弟收養於家幾二十年喪葬嫁娶皆身任之綜其生平體舌耕之苦以贍其家先以孝父母之心推而施諸兄弟又以友兄弟之心推而施諸子姪並及其宗族每年館金所入一文不私居恒兄弟怡怡如也子姪恂恂如也閨門之內秩秩如也同堂四世幾百年自少至壯至老無纖悉參商至屋不能容乃析居後仍與未析時無異蓋得於修身齊家之道者也民國五年任烈校教員病歸卒於家年六十有六

周冕傳

尹之任

周冕譜名興柱字作之縣西北烈面鄉人五歲失怙母氏譚孀居撫育家時窘學不能繼膏火賴其母紡績以助族師周治安品學俱優經師而兼人師者也愛其穎異並敬其母之苦節不取脩脯教誨倍殷冕因感激奮勉爲學日進而品亦高潔如其師初應童子試卽列前茅以赴郡遠缺貲斧就近冒籍入南充學旋補廩餼教授鄉里以贍其家清末駱聞亭司南充教鐸愛其文字並重其品行爲出貢保送入京應文官試考列乙等候選按經歷時清政不綱兼以母

老不欲其遠遊遂無意仕進仍鄉居訓徒其教人一以道德爲尙躬自檢飭平居几案必光潔筆研安置有常書籍整齊檢閱後卽復舊雖丹鉛數經無墨汚之跡無躓折之痕數十年冊卷如新製然坐立未嘗見其箕踞跛倚行則挺然正視不偶斜睨遇人不苟言笑當大庭廣衆間尤木訥若於函丈誨子弟則諄諄不倦談文章必左國莊列及遷史班漢謂學者宜取法乎上也民國初長縣立第二高小校有年旋復任縣一高小校國文教員諸弟子莫不愛之敬之尊奉之如山斗爲文峭麗有奇氣鄉里有所撰述恆推重之其自爲大父行述曰冕於學少有所得絜大父是賴當先君子之初卒也大父憫冕之少孤重翼覆之夜則引與同寢雞初鳴卽蹴冕曰起乘此平旦得初氣可以讀矣則披衣爲篝火聽誦聲琅琅掀髯大歡悅平明看冕上學去始返以爲常嗚呼大父如父可一日忘哉大父諱家富字醇良爲曾祖茂德公之特子也甫六歲而茂德公捐館舍曾祖妣張矢志撫之大父性至孝遇母有不豫則長跪請教必得其歡而後起時五房同爨高祖文山公老年倦於勤則命大父輟讀理家政大父敏

於事而推誠以與人時無頃停職無纖曠內外食指數十無賢愚少長皆融洽無少間由是家一起以饒裕稱於鄉大父爲人肫樸貌頎骨重鬚髯數十莖羅羅可數望而知爲太古人也當清同光間海宇肅清士大夫循循於禮讓鄉風民俗皆以樸厚相高尚時大父年六十餘矣野處養閒間日具觴豆招鄰家叟三數輩聚談古近有關人紀事其剖析之精爲老師宿儒所弗及長夏無事又聚村中子弟坐庭樹下供以清茗佳果爲講孝友忠信事雜引古人以證之以故鄉里皆愛重大父見之則肅然起敬無敢慢者而性尤喜施每歲除日用外悉以圃里中之困乏者至寒家子之能讀者則倍資之曰助鄰子之學藉以勵吾孫之學也故冕之於學少有得繫大父是賴大父晚年善攝養侍側數十年未見一咳唾卒年八十九清贈文林郎此冕壯時所作文也錄之以見一斑且以見其學行之美有所自來晚年文益醇粹著有史評四冊文集四冊雜詩四冊聯語二冊待梓民國十三年秋嬰風疾卒

楊安文傳

張汝翼

楊安文字蔭春邑惠新里人幼業儒屢戰童軍不利遂於清光緒間援例納爲國子監爲人敦厚周慎有古人風其生平事蹟合川附貢龐文杰爲撰墓誌銘言之甚詳茲錄其文曰公先世志臣公以清康熙時由鄂遷蜀家武勝之樂善鄉五傳至怡元公生子四公居長次安武次安泉安濤皆懋遷於外獨公侍養庭幃比暇則游心典素覘悉靈槩屬文有游思恣志之奇中年師濂洛學說守約思博文復冲然以逸然不合於時侘僚而噓迺擊倉公術兼得種牛痘法於湘人丁全生活人難覩縷計其事丁醫師也如事鄒業師作章兩師捐館皆公力營葬心喪三載事亡若存殆深得古君子報本之遺意者耶宜鄉之人漸摸而化之也葆田先生公之喆嗣也幼承庭訓稍長公爲築舍宅外延名師敦厲之葆田以清光緒戊戌入泮辛丑食餼旋膺大府命赴日本習師範歸國歷任教員縣視學教育局長兼縣議員統計處委員等職有勞績省署記名以縣知用民國戊辰以國民革命第二十八軍三師司令部顧問官兼膺四川教育廳命任武勝縣中校校長時杰亦備飲教因得從葆田先生遊習知其人淵默而

識粹乃益服公之家學玠然有則也公生咸豐癸丑十二月十三日以民國癸亥年十二月十一日卒得年七十卜苙兆而厝焉今年秋葆田爲公封厥墓屬杰誌而銘之杰夷考墓誌肇始西漢景君墓表與漢杜子夏臨沒鐫石兩事墓銘則濫觴於漢王史威長葬銘卅二字洎宋以降銘誌駢行然無可傳一易世則泯矣公非遑遑可傳以詔來茲者耶印山環水之間公之休風在焉月明華表雲化藤陰他日過豐阡而下拜斗酒沃醑其亦有鄭旒庾樹之思乎銘曰旣安且固以利其嗣人是爲處士蔭春公之墓

秦培善傳

尹之任

秦培善號芝軒縣西龍女鄉人父立堂爲邑廩生有文譽家貧教讀於外培善幼隨父學性循謹遵訓不違年十四盡通五經爲帖括制藝超異儕輩弱冠入邑庠父旋病卒哀毀盡禮以父與叔素孝和先未分炊欲繼其志惟食指繁饗殮之費求給於書不可得以其家居於市於賈爲宜和變計率諸從弟貨殖億輒中治家復嚴整有禮法門庭肅然人無游惰家以漸康餘暇則爲鄉里排解

其紛難正言讜論莫不服從鄉人愛其公正倚其威重推爲團總其規畫公益慮精審詳期於無弊故事無不舉其奉行官府之事仍必酌量輿情出以至公不阿上以剝下其於地方注重農商嚴禁淫賭入其市中鮮見有衣冠不正者闔邑二十鄉風俗之良莫能過也而培善之力爲多清末改政縣設議參會培善被選爲參事員於縣中利弊頗有所興除見到卽言不畏彊禦洵所謂中堅份子也民國十四年避匪於順慶船行被水感寒致疾歸卒於家時年五十有

四

劉德光傳

尹之任

劉德光字厚甫歲遺生走馬鄉人性純厚謙謹鄉試屢薦莫售鄉居授徒門下采芹食餼者以百數計其教學以行義爲重凡閭里紈袴子見之無不敬畏清咸豐中滇匪擾境與其長兄德範練團修砦勞怨不辭里黨賴以保全德範尤好施濟常暗墊錢爲人解紛事又收育女嬰之被棄者故鄉以善人稱之德範年八十德光年八十六均無疾卒其子孫並多秀穎云

段黼堂傳

龐文杰投稿

石照之西有宿學士段黼堂者邦其派彥其諱也少讀書博聞強識弱冠補弟子員食饗餼候選教諭性沈靜酷嗜學宅右結室擁書千百卷其中朝夕吟誦不輟尤喜爲文每得意輒下筆不自己舊稿盈筐篋交遊者過而讀之豁然得所解而去僉曰此今之周茂叔也以爲有道廬博雅宗焉厥祖成章公與厥考翊臣公以詩書貽子孫培植之厚遞有數傳公之考多才尤健幹鼎力捭擋家事故公爲主器猶得寢饋於詩書公歷秋戰十二次堂備四房薦者數數矣卒不得展厥志退而教育益力學不倦公之雁行有四次升菴公試不遇持家因勸捐入成均咸豐乙卯科鄉試房薦三篤齋公早逝其歷署教職者公四弟子吉公也從學十載相與拂窗洗硯辦難質疑怡怡如也友愛如此孝可知已候選訓導印山公者公堂弟也師事公與子吉同遊庠其他栽桃李多方善誘人艷稱焉公爲邑巨族有貧不能讀者且資以助其讀蓋樂育英才素性然也平居閱經史百家多妙悟故爲文析理淵深朗朗如玉山行山東進士車錫侯來

宰是邑一見而心儀之以學優未仕爲公惜而公則不以出處介諸懷也殆所謂學道有得之君子歟黼堂生嘉慶己巳九月初二日卒咸豐庚申正月十六日得年五十有二

王鴻鈞傳

采訪員投稿

王鴻鈞字禹鄉德清里人祖志灼邑名孝廉父蓮舫爲附學生生子三鴻鈞其仲也幼聰慧善讀長從胞叔文坡學制藝文思敏捷筆致輕靈當科目時代遂挾其技以遊泮食餼清季考入四川法政學校畢業後迭次舉辦縣中公益事縣人咸稱其能迄民國肇建之初任本縣行政課長有聲後被選爲省議員復經財政司委爲潼川保寧清提委員事竣回籍任縣立第一高小校教員教授國文口講指畫不憚煩未幾改充校長恩威兼施學生百餘名咸懍懍然生敬畏心民國七年秋省總團務處成立令全蜀各縣組織團務局設局長一人僉以鴻鈞學識素優富有經驗舉充斯職三任三已喜愠不形於色其在任時務求撙節以解輕人民負擔至迫於匪勢亟應整頓如催促各鄉操練團丁購買

鎗彈不避勞怨意在同保公安不在一己之權利惟其公務念重雖至親不敢干以私警備時隊長王漢章鴻鈞之嫡堂侄也相見之頃除職司事外未嘗言及於他亡何因公積勞成病於民國十四年卒於家年五十有七

龐鏊溶傳

龐文杰投稿

鏊溶姓龐氏諱孝植號鑑峯居邑之興隆鄉少讀書聰穎佚羣輩父猷亭早歿賴母劉敦勗之鏊溶年二十二入清邑庠因得肆力於學旋食餼調四川尊經書院復考入四川高等學堂畢業襄教合川中校思母春秋高賃屋迎養杜鰈冬葦聿殫孝思洎民國勦立改革專制舉任武勝縣副司令旋奉大府令委岳池縣知事川北張宣慰使拒之迺歸任縣視學民國十五年冬任修志局主辦明年秋兼任縣初中校長淬思擘幾嘔竭心血以十七年夏捐館君子悲之生平磊落抑塞中年研究哲學益疏宕嘗語人曰不讀書三萬卷不遊歷洪河大山非夫也屬文雋肆矜洽有杜必簡崔安成之特槩詩則孟追嶸阮勁練妙達邈軼末紀蓋得力於載籍與山水者竝矣贊曰倥乎其負蹕乎其致今猶遇斯

人耶

夏萬甲傳

采訪員投稿

夏萬甲邑樂善鄉人當父母歿時祖母唐尙病存嘗臥牀縛萬甲與其婦張氏往來蹀躞更相服侍唐恒苦便艱則以食指入穀道取之略無難色如是者三載後萬甲年逾三十未有育或勸娶妾不納惟日以慈善事業爲務未幾舉一子名代賢忠樸能讀清光緒中得入邑庠論者謂由萬甲之孝德所致

張祖琦傳

尹之任

張祖琦縣西烈面溪人家貧貿陶器爲業其子恩圃訓蒙助之與銅梁同宗名萬鎰者相識年均六十餘光緒三十年五月琦與鎰相值於烈鎮茶社外鎰呼之曰老四救我琦行四故呼如此琦視之形瘦如柴緣壁行問之曰病矣琦扶之到家命其子待養及夜深琦子問鎰事半响方答曰余調羹經此矣再問之不應及曉遂死琦問子曰彼臨終有所囑乎曰止有調羹經此一言琦曰是必販調羹過此臨江探之果有陶貨船過留之運貨於家約值錢百餘緡琦購棺

製衾葬之鶴山下揣知鎰賒山主貨價未清遣人報信鄉人謂其貧可取貨爲
已有琦不聽山主來問其價數悉予之

楊敏字傳

李秉鈞

楊敏字錫章邑東惠里人性聰穎幼從明經周作人孝廉田開文讀千言立就
咸以大器目之然屢困童軍卒未獲售值父年邁命理家政兄弟子姪雍雍一
堂足徵友愛事親極孝時母氏多病錫章恐誤於醫特精研岐黃爲母診治後
母年登八十有三非偶然也錫章既精醫遠近求醫者踵相接咸不取值貧苦
者且給以藥資活人無算性喜讀晚年猶好學凡有關身心家國之書靡不披
覽而於王陽明致良知之學尤深究有得嘗以勤謙忠恕四字誡子弟卒年七
十一

陳重徐傳

尹之任

陳重徐號權菴仁化里烈面鄉人也少嗜讀天姿穎異作詩文有奇氣嘗撰紫
雲宮碑記陳孝廉秋濤謂如昌黎行文以氣滂溥沛艾小大畢浮其傾倒若此

而微風其喜任俠爲氣質病蓋多之也不喜爲制藝致未入庠而性特豪爽鄉鄰有雀鼠爭得其一言無不釋然以去尤好義急公前清光緒丙申歲秋雨連月稻盡壞明年大荒遠近流氓洵洵權菴倡發倉穀獨任其咎全活無算適邑無賴仇外教啓巨禍其黨又藉恣焚掠權菴練團當之卒擒渠魁事平名籍甚清季被選爲縣議員籌設總收支凡利弊應興革知必盡言不屑隨俗俯仰時復高談驚座有陳同甫旁若無人之概果其裔與民國十一年卒於家年六十有六

盧文治傳

龐文杰投稿

盧文治字玉田世居邑之清平鄉少讀書蓄大志以不見用怵恟侘僚乃移治生計清同治末社倉儲穀缺然玉田糾同志阜之歲饑待哺者胥資以活合武間舊有慈善會爲老宿龐駿與其姪繼周募資勦建玉田出巨金益之鄉曲有不能埋葬及嫁娶者多被潤焉今會澤矣嘗語人曰吾無他長第有益吾鄉者咸敦爲焉性寬遜不與人爭清光緒中里兒某干厲法移誣之玉田罹冤抑經

大府昭雪迺免踰年里兒亦有歸玉田憬然曰橫逆之遭賢者不賦予何人斯
遂遂焉可耳贊曰安平竝邈休甫聲施非若人而疇媿夫斯

馮鏊傳

李秉鈞投稿

公名鏊字子謨姓馮氏原籍楚之衛陽人先世入蜀家於定遠遂爲定遠人祖
友臣以計然起家父爲有隱德時髮逆以拾餘萬衆環困縣城城旦夕可破公
父力助知縣事李公承保籌守禦方賴以待黃公子春援獲免於難當城爲大
軍擊潰俘虜甚夥復請當道釋其脅從者全活無算僉謂仁者必獲報公生而
穎異幼讀書至古人忠孝出處大節輒抉其所以然故事親諧以孝弱冠擿芹
極慕范文正公之爲人恆曰人之職責所繫固有重輕要其本不越於一心苟
能以虛心講求以實心幹濟以精心察照以公心推行毋沽名毋懼謗毋矜已
徇人而爲清夜自矢之素縱未敢言功亦可以無大過人服其言因屢困棘闈
改捐湖南新市巡檢蒞任初卽安輯地方拊循人民躬節儉以勵其俗敦詩書
以施其教每於公餘轅車出遊詢問民間疾苦父老迎謁道左或奉雞黍或獻

果瓜備極歡欣不覺官民相隔在任三年亭無枹鼓之警里有室家之樂農安耕鑿士習禮讓民服其化丁憂回籍邑令遇有公事莫不延訪之興利除弊多所贊助值歲旱米價陡昂公請糶谷以平市價貧民稱便後獲有秋穀羨悉歸公今東郊外王爺廟正殿卽此款所建修者也性尤好義鄉黨有貧乏或急難者應之無毫髮悵亦不以疏數分勤惰民國成立邑人舉公任知事年餘政簡刑清亦如新市旋以迴避原籍堅辭頤養政府傳語嘉獎擬調繁劇昆仲三均列黌宮友于足風子二長蕙陔以案首入邑庠有文行次薰陔成都中學畢業諸子侄均殖學克世其家卒年七十贊曰禮以禦災捍患列入祀典嘉其勤衆事也今公職在下僚司不及百里提封而能勞於衆事勤恤民隱若此雖縣人尸祝之可也然民國去古已遠邑人冀公之德不惟口述之而心實感之以示愛慕於無窮豈非公至誠有以動之哉吾於是不多邑人之愛公而多公有以致民心之直也詩曰豈弟君子民之攸暨公無愧焉

李藩傳

游鴻如投稿

君諱揚名字藩號野青縣屬義和鄉人也曾祖尙珍祖先平考宗盛皆淳樸敦厚以耕讀自給君先世居雙星鄉之小橋至先平公始遷至義和鄉遂家焉君資稟瑰異嗜書民國八年入縣立第一高小校爲文蓬勃馳聘常平反古人成讞爲師友所重居亡何以事件學校當局未卒業卽攷入合川中學讀一年復轉學重慶聯合中學校課暇君尤喜作社會活動居恒語人曰社會一大學校也吾人爲學烏可墨守陳編而忽視經驗乎入聯中未一年頭角頗露校中會社皆有君名舉職員輒膺選先是聯中師生爲近村窶人子就學便利計設有平民校分高初兩級至是已達百數十人同學知君幹練乃推主校務君悉心擘畫所立矩矱無不中繩墨合程度且躬親勞役卽油印瑣務皆以身任之以是君名噪甚而平校學生之成績持以與渝埠公私立各小學較皆無遜色十三年畢業初擬漫游京滬以竟所學阨於貲不果行乃回縣任通俗講演主任兼平民夜課學校教員嘗奔走四鄉逢市集則聚村民演說舉凡國家社會之大日用生活之細隨機引發聽者大悅又嘗謂啓迪民智文字宣傳實所以濟

語言之窮復出其餘力集二三同志創辦朝陽報社旬日爲期吾武年來文化
猛進刊物之興盛於兩簞溯其原始此實樞輪故居今日而談武邑文明君實
有馬路籃縷之功焉又嘗歷任二年制師範學校及區立第一高級小學校職
教員皆有聲君性亢壯頗豪於飲胸有抑鬱輒邀知己飲及醉則縱論縣政刺
刺不少休尤直戇好面折人見人過不少假借以是人皆憚之十五年九月縣
府奉大令成立四川善後議案監察委員會與財政監理委員會分會縣人以
君剛正推長兩會就職後於地方行政多所論議不少唯阿凡政府捐稅稍繁
重輒爲民衆呼號必得請乃已監察財政尤嚴稽核名實審較錙銖貪夫以廉
君旣服務教育有年見縣境盜匪滋蔓民生日蹙居嘗自慨曰吾人居今日而
欲改造社會宜以整頓團務爲先教育雖根本大計顧無以濟緩急乃稍稍厭
棄教育生涯慨然有振興團務之志適陳君宜書新長縣團務局延君爲常住
參議有所諮詢君必反復陳說多所匡正十六年夏義鄉土匪蜂起擄人勒贖
鄉民大恐多走愬君乞其回鄉辦團以資蔽翼君不忍乃屈就團總職徵丁置

械防塞固不數月團勢浸盛君治匪嚴有所獲必繩以法不少寬假以是召
匪嫉憎之幾次骨屢欲得君惟久未得便陰歷九月十六日匪徒廉得君必於
午后歸家乃先以數十人設伏要於途一則喬裝戮刈草道旁君過突前摳君
衣出懷中槍連發五彈創重遂死君既遇害里巷婦孺皆歎息泣下事聞於縣
團務局以三百金撫卹其家屬明年劉公子藩來宰是邦猶仰其高躅追贈直
道長存四字匾題以資表異君生於庚子年九月十四日享年二十有八葬於
普羅橋祖塋之旁弟兄四君居長仲揚聲字自榮肄業於成都志城法學院爲
縣名士叔揚鷹季揚眉皆聰慧嗜讀配陸氏子二祖述祖德女一祖芳